

明史紀事本末

二





明史紀事本末

(二)

谷應泰編

明史紀事本末

卷八

北伐中原

元順帝至正十九年九月。明太祖遣千戶王時往方國珍所。附海舟至元都。偵察元政。及察罕帖木兒。李思齊軍馬情形。時察罕克汴梁。平山西。秦隴等處。遂分兵鎮守關陝。荆襄。河洛。而重兵屯太行。日練兵積穀。謀恢復山東。軍聲大振。故遣時往探之。

二十一年八月。復遣都事汪河使元通好。察罕帖木兒。時察罕用兵山東。招降東平田豐。樂安俞寶等。其勢頗盛。上謂左右曰。察罕帖木兒雖假義師。圖恢復。乃與孛羅帖木兒兵爭不解。屢格君命。此豈忠臣所爲乎。又聞其好名。如田豐傾側。亦復待以腹心。則昧於知人矣。吾今遣人往與通好。觀其行事。然後議焉。二十二年春正月。元平章擴廓帖木兒遣使來通好。擴廓察罕甥王保保也。察罕養爲己子。先是察罕駐汴梁。太祖嘗遣使通好。旣而察罕亦以書來聘。太祖以前所遣使不還。不之答。察罕尋爲叛將田豐。王士誠所刺。擴廓代領父衆。乃遣尹煥章送我使者。自海道還。太祖復遣都事汪河與俱往報禮。河至河南。擴廓留之。拘於陝州。踰三年始得還。以爲吏部侍郎。

二十六年夏四月壬戌。元徐州守將樞密同知陸聚聞徐達等已克淮安。以徐宿二州詣達軍降。太祖嘉其識天命。命爲江淮行省參政。仍守徐州。於是邳。蕭。宿。遷。睢。甯諸縣皆降。秋九月。上遣書送元宗室神

保大王及黑漢等九人於元主。

吳元年元至正二十七年也。春正月遣使以書諭元擴廓帖木兒。先是使臣汪河爲擴廓所拘留。太祖以書諭之不報。至是復與之書。略曰。予自起義以來。拓地江左。閣下之先。以興復爲名。提兵河北。古人朝聘往來。不過將道誠意。今汪河去而不返。是所拘者少。所失者大也。閣下地非不遠。兵非不多。所慮者張思道操刃於潼關。李思齊抗衡於秦隴。兪寶畜變於肘腋。王信生靈於近郊。閣下自以功成。安如泰山。坐使羣雄連結。禍機一發。首尾莫救。此深爲閣下惜。所以數遣使人奉書。瀆聽者。是予欲盡一得之愚於閣下。閣下何爲自矜。倘能遣使。刻日將命。以汪河。錢禎等還。豈惟不失前盟。亦可取信天下。如其不然。我則命襄陽之師。經唐鄧之郊。北趨嵩汝。以安陸。沔陽之兵。掠德安。向信息。使安豐濠泗之將。自陳汝擣汴梁。徐邳之軍。取濟甯。淮安之衆。約王信海道舟師。會兪寶同入山東。此時閣下之境。必至土崩瓦解。是又開我南國之兵端。爲彼後日之戰禍。閣下其審思之。毋始後悔。命傅友德守徐州。二日丁未。元擴廓帖木兒遣驍將左丞李貳來寇。兵駐陵子村。友德堅壁俟其出掠。乃將步騎三千餘。溯舟至呂梁。捨舟登陸。擊之。李貳遣裨將韓乙盛兵迎戰。友德躍馬奮槊刺韓乙墜馬。敗去。友德度李貳必益兵來鬪。趨還城。開門出兵陣於城外。令士卒皆臥鎗以待。聞鼓聲。卽起擊。有頃。李貳果率衆至。友德令鳴鼓。我師奮起衝其前鋒。李貳衆大潰。溺死無算。遂生擒貳。獲其將士二百餘人。馬五百匹。擢友德江淮行省參知政事。十月甲子。太祖命將北取中原。謂信國公徐達等曰。自元失其政。生民塗炭。予與諸公仗義而起。冀有奠安生民者出。豈意大難不解。爲衆所附。遂平陳友諒。滅張士誠。闔廣之地。將以次而定。尙念中原擾攘。山東則有

王宣父子反側不常。河南則有王保保。上疑下叛。關隴則有李思齊。張思道。彼此猜忌。與王保保互相嫌隙。元之將亡。其機在此。今欲命諸公北伐。計將何如。遇春對曰。今南方已定。兵力有餘。直擣元都。以我百戰之師。敵彼久逸之卒。可挺竿而勝也。都城既克。乘勝長驅。餘皆建瓴而下矣。太祖曰。元建都百年。城守必固。若如卿言。懸師深入。頓於堅城之下。餽餉不繼。援兵四集。非我利也。吾欲先取山東。撤其屏蔽。旋師河南。斷其羽翼。拔潼關而守之。據其戶檻。天下形勢入我掌握。然後進兵元都。則彼勢孤援絕。不戰可克。既克其都。鼓行而西。雲中九原。以及關隴。可席卷而下。諸將皆曰。善。太祖因顧達曰。兵法廟算勝者。得算多也。於是命徐達爲征北大將軍。常遇春爲征北副將軍。率甲士二十五萬。由淮入河。長驅北伐。復召諸將諭之曰。征伐所以奉天命。平禍亂。故命將出師。必在得人。今諸將非不健鬪。然能持重有紀律。戰勝攻取得爲將之體者。無如大將軍達。當百萬之衆。勇敢先登。摧鋒陷陣。所向披靡。無如副將軍遇春。然吾不患遇春不能戰。但患其輕敵耳。吾前在武昌。親見遇春纔遇數騎挑戰。卽輕身赴之。彼陳氏如張定邊者。何足稱數。尙據城指揮。遇春爲大將。顧與小校爭能。甚非所望。切宜戒之。若遇大敵。遇春領前鋒。當與參將馮宗異分左右翼。各將精銳擊之。右丞薛顯參政傅友德。勇略冠諸軍。可使獨當一面。或有孤城小敵。但遣一將有膽略者。付以總制之權。皆可成功。達則專主中軍。策厲羣帥。運籌決勝。不可輕動。古云。將在軍。君不御者勝。汝等其識之。又謂傅友德曰。此行汝當努力。昔漢高祖與項羽爭衡。彭越宣力於山東。今用師自山東始。汝其勉之。是日。太祖親祭上下神祇於北門之七里山。祝畢。復召將士諭之曰。此行非必略地攻城。要在削平禍亂。以安生民。凡遇敵則戰。若所經之處。及城下之日。勿妄殺人。勿奪民財。勿毀民

居勿廢農具。勿殺耕牛。勿掠人子女。或有遺棄孤幼在營。父母親戚來求者。卽還之。丙寅。馳檄諭齊魯河洛燕薊秦晉之人。檄曰。自宋祚傾移。元主中國。此豈人力。實乃天授。自是以後。元之臣子。不遵祖訓。廢壞綱常。有如大德廢長立幼。泰定以臣弑君。天歷以弟鳩兄。至於弟收兄妻。子烝父妾。上下相習。恬不爲怪。夫君人者。斯民之主。朝廷者。天下之本。禮義者。御世之防。其所爲如彼。豈可爲訓於天下。及其後嗣荒淫失道。加以宰相擅權。憲臺報怨。有司毒虐。於是人心離叛。天下兵起。使我中國之民。死者肝腦塗地。生者骨肉不保。雖因人事所致。實天厭其德而棄之也。當此之時。天運循環。億兆之中。當降生聖人。立綱陳紀。救濟斯民。今一紀於茲。未聞有濟世安民者。徒使爾等戰戰兢兢。處於朝秦暮楚之地。誠可矜憫。方今河洛關陝。雖有數雄。阻兵據險。互相吞噬。皆非人民之主也。予本淮右布衣。因天下亂。爲衆所推。率師渡江。居金陵形勢之地。得長江天塹之險。今十有三年。西抵巴蜀。東連滄海。南控閩越。湖湘漢沔。兩淮徐邳。皆入版圖。奄及南方。盡爲我有。民稍安。食稍足。兵稍精。控弦執矢。日視我中原之民。久無所主。深用疚心。予恭承天命。罔敢自安。方欲遣兵北伐。拯生民於塗炭。復漢官之威儀。慮人民未知。反爲我讎。挈家北走。陷溺尤深。故先諭告。兵至。民人勿避。予號令嚴肅。無秋毫之犯。爾民其體之。十一月壬子。克沂州。初。揚州興化人王宣。元末爲司農掾。治河有功。命爲招討使。從也。速復徐州。授義兵都元帥。宣子信。從察罕帖木兒破田豐。復令宣與信還鎮沂州。至是。達師至淮安。以書諭宣父子使降。信得書。遣使納款。太祖遣徐唐臣等至沂州。授信江淮平章政事。令以兵從大將軍征討。宣父子陰持兩端。乃令信密往莒。密募兵。而遣人詐犒師。以緩我軍。達受而遣之。使還。宣卽以兵夜劫徐唐臣。欲殺之。衆亂。唐臣脫身走。達軍達卽日率

師抵沂州。分兵急攻之。都督馮宗異令軍士開壩放水。宣自度不能支。開門降。達令宣爲書遣鎮撫孫惟德招降信。信不從。殺孫鎮撫。走山西。於是澤州趙蠻子。莒州周黼。海州馬驪。及洙陽日照。贛榆諸縣。并隨信將士皆來降。達以宣反覆。執而戮之。命韓溫守沂州。太祖遣使諭達曰。聞將軍已下沂州。如向益都。當遣精銳扼黃河要衝。斷其援兵。可以必克。若益都未下。卽宜進取濟甯。濟南二城。旣下益都。山東勢窮力竭。如囊中物矣。達命平章韓政略榆行。梁城諸鎮寨。繼又令政分兵扼黃河。以斷山東援兵。政遣千戶趙實略滕州。元守將楊知院遁去。達進攻益都路。宣慰使普顏不花捍城力戰。不能支。城陷。還與母訣曰。兒不能兩全忠孝矣。達聞其賢。遣使召之。不往。被執不屈。與總管胡濬。知院張俊俱死之。不花妻阿魯真亦抱其子女投井死。執其平章老保與白知縣等。獲士馬兵糧以萬計。十二月丁未。都督同知汪興祖師至東平。元平章馬德棄城走。興祖遣指揮常守道千戶許乘進至東阿。元參政陳璧以所部五萬餘人降。乘復以舟師趨安山鎮。元右丞杜天祐。左丞蔣興皆降。徐達至濟南。元平章忽林台詹同胞。因帖木兒先驅人民引軍遁。平章達朶兒只進巴等以城降。得將士三千八百五十五人。馬四百二十九匹。命指揮陳勝守之。庚戌。汪興祖至濟甯。元守將陳秉直棄城遁。甲子。徐達遣參政傅友德取萊陽。丙辰。上復遣使諭達。遇春曰。聞大軍下山東。所過郡縣。元之省院官降者甚多。二將軍皆畱於軍中。吾慮其雜處。或晝遇敵。或夜遇盜。將變生不測。非我之利。蓋此輩初絀於勢力。未必盡得其心。不如遣之使來。處我宦屬之間。日相親近。然後用之。方可無患。若濟甯。東平諸來歸將士家屬。亦發遣來。將厚待之。

太祖洪武元年二月癸卯。詔湯和。遠明州。造海舟。漕運北征軍餉。都督同知康茂才率師往濟南。從大將

軍達北征。癸丑，常遇春克東昌。元平章申榮自經死。在平等縣皆降。丙寅，徐達平樂安。初，樂安愈勝納款，達禮而遣之。勝歸，復叛。達進攻之，師至土河，距樂安五里，命軍士填壩以進。郎中張仲毅出降。勝遁去。達命指揮華雲龍守之。戊子，命中書省給榜，撫安山東郡縣。時山東悉平，令所在訪賢才。凡仕元者，疑懼不自安，故榜諭之。丙申，上別命征南將軍鄧愈帥襄陽、安陸、景陵等處兵北略地。愈遣別將王成、李廷琛攻唐州。克之，進取南陽路，擒其將史國新。徐達引兵上黃河，克永城，歸德、許州。師至陳橋，己亥，左君弼、竹昌以汴梁降。先是，君弼自唐州走安豐，復走汴梁。元汴梁守將李克彝使守陳州。上遣使諭以書曰：曩者兵連禍結，非一人之失，予勞師暑月，與足下從事。足下乃舍其親而奔異國，是皆輕信羣下之言。以至於此。今足下奉異國之命，與予接壤，若欲與師侵境，其中輕重，自可量也。且予之國，乃足下父母之國，合肥乃足下丘壠之鄉。天下兵興，豪傑並起，豈惟乘時以就功名，亦欲保全父母妻子於亂世。足下以身爲質，而求安於人，旣已失策，復使垂白之母，糟糠之妻，天各一方，以日爲歲。足下縱不以妻子爲念，何忍忘情於老母哉！功名富貴，可以再圖，生身之親，不可復得。足下能留意於是，幡然而來，予當棄前非，仍復待以故。君弼得書，猶豫不能決。上乃歸其母於陳州。君弼感泣。至是，大兵下山東，西指汴洛。克彝夜驅軍民遁入河南。君弼與竹昌等率所部兵詣達降。達命都督僉事陳德守汴梁。率步騎自中澗進取河南。彗星出昴北。夏四月，徐達率大軍自虎牢關進至河南塔兒灣。元將脫目帖木兒以兵五萬迎戰。列陣於洛水之北。我軍旣成列，常遇春單騎執弓矢衝入其陣，敵發二十騎攢槊刺遇春。遇春發一矢斃其前鋒，大呼殺入。達指揮乘之，俘斬無算。脫目帖木兒將散卒走陝州。達遂進營於河南城北門。李克彝

復走陝西。元河南行省平章梁王阿魯溫送款軍門。戊申。河南平。命達左丞趙庸守之。壬子。副將軍常遇春率兵至嵩州。守將李知院迎降。甲寅。入其城。分兵下。未附諸山寨。戊子。元鞏縣孟夏寨參政李成降。庚申。元福昌知院張興鈞州守將哈刺魯許州右丞謝李陳州知院楊崇各遣人詣大將軍降。辛酉。參政傅友德分兵取福昌山寨。元右丞潘莽兒降。副將軍常遇春下海州。留兵守之。遂徇下郟縣。壬戌。都督同知馮宗異克陝州。元守將脫目帖木兒復棄城遁。以都督同知康茂才守之。大軍克裕州。執元守將平章郭雲。雲勇敢有謀略。時河南諸郡皆下。獨雲守裕州。累戰不克。招之不從。後以孤軍敗被執。上嘉其忠義。釋而用之。詔免山東夏稅秋糧。中原兵難之後。流離失業者多。遣使賑恤。甲子。車駕發京師。幸汴梁。時言者謂君天下。宜居中土。汴梁宋故都。勸帝往視之。且會大將軍謀取元都。五月庚午。大將軍徐達遣指揮王臻帥兵往虢州。取毛葫蘆山寨。甲申。登封鞏縣雞翎山。並天堂山寨。復叛。徐達遣指揮豐諒率兵討平之。指揮任亮克露豹王山等寨。參政傅友德取凌青黑山二寨。庚寅。車駕至汴梁。辛卯。常遇春馮宗異至行在。謁見。徐達尋自河南至上。皆慰勞之。達等頓首謝。既退。上復召問。達取元都計。達對曰。臣自平齊魯。下河洛。王保保逡巡太原。觀望不進。今潼關又爲我有。張良弼李思齊失勢西竄。元之聲援已絕。臣等乘勢搏其孤城。必克無疑。上據圖指示曰。卿言固是。然北土平曠。利騎戰。不可無備。宜選裨將提兵爲先鋒。將軍督水陸之師。繼其後。下山東之粟。以給饋餉。由秦趨趙。轉臨清而北。直擣元都。彼外援不及。內自驚潰。可不戰而下。達受命退。丁酉。以江西行省左丞何文輝守河南。任亮守嵩州。都督同知康茂才兵至河北。安邑。夏邑皆降。七月。鄂愈進兵克隨州。元守將右丞王誠降。壬午。新寨麻張等叛。愈遣

指揮吳復討平之。時潼關以東悉平。上命諸將遠師。進取元都。上將發汴梁。大將軍徐達等自陳橋入。辭諭之曰。朕與公等率衆渡江。誓除禍亂。以安天下。士卒舍父母妻子。戰鬪於矢石之間。百死一生。久未休息。朕每念之。惕然於中。非得已也。今中原之民。久爲羣雄所苦。死亡流離。徧於道路。天監在茲。朕不敢忘。故命爾等帥師北征。拯民水火。昔元祖入主中國。子孫怠荒。罔恤民艱。天厭棄之。君則有罪。民復何辜。前代革命之際。兵戈相加。視如仇讎。朕實不忍。爾諸將帥克城之日。毋擄掠。毋焚蕩。毋妄殺人。必使市不易肆。民安其生。凡元之宗戚。皆善待之。庶幾上答天心。下慰人望。以成朕伐罪救民之志。有不恭命。必罰無赦。丙申。車駕發汴梁。還京師。以副將軍馮宗異畱守。徐達遂檄都督同知張興祖。平章韓政。都督副使孫興祖。指揮高顯等將益州濟甯徐州之師。會於東昌。元大都紅霧及黑風起。閏七月。徐達等分布士馬。規取河北。遂自中灣渡河。庚子。右丞薛顯參政傅友德兵至衛輝。元守將平章龍二棄城走。彰德。辛丑。徐達等師至淇門鎮。傅友德獲嘉縣尹胡仲信。達命從鎮撫王處仁守衛輝。癸卯。師至彰德。龍二復出走。陳同知等將軍門降。達令左丞楊思祖守之。明日。龍二部將楊義卿以船八十艘來歸。遂下磁州。進攻廣平。元平章周昱棄城遁。邯鄲尹都文玉率父老降。克趙州。獲元將侯僉院等。己酉。進次臨清。遣人詣東昌。趨都督同知張興祖以師來會。又檄守樂安指揮華雲龍將兵從征。庚戌。傅友德游騎獲元將李寶臣。都事張處仁。以爲鄉道。達因遣友德開道通步騎。都督副使顧時浚開通舟師。時諸將駐臨清久。知府方克勤籌應芻糧。無匱乏。朱亮祖勒民夫五千瀋河。克勤不忍勞民。泣禱於天。天大雨。水漲。舟遂行。癸丑。平章韓政。都督副使孫興祖俱以師會臨清。於是大將軍徐達率馬步舟師北發。命韓政守東昌。并鎮撫臨清。

達師至德州。常遇春、張興祖及指揮高顯、毛讓、程華等皆會。戊午，達等師至長蘆。元守將左僉院遁去。達命指揮費子賢守之。分兵徇下青州。師至直沽，獲其海舟七艘，造浮橋濟師。常遇春、張興祖各率舟師並河東西以進。步騎遵陸而前。元丞相也速等捍禦海口，望風奔潰。元都大震。癸亥，大將軍徐達等師至河西務，大敗元平章俺普達、朶兒只進巴。擒其知院哈刺孫等三百餘人。達進兵至通州，營於河東岸。常遇春營於河西岸。衆欲速攻之。指揮郭英曰：「吾師遠來，敵以逸待勞，攻城非我利也。宜出其不意攻之。」翼日大霧，英以千人伏道旁，率精騎三千直抵城下。元將五十八國公率敢死士萬餘，張兩翼而出，戰良久，英佯敗，敵乘勝來追。伏兵起，截其軍爲二，斬首數千級，擒其將卜顏帖木兒。丙寅，達率諸將入通州。是月二十七日也。元主聞報大懼，集后妃太子議避兵北行。遲明，召羣臣會議，端明殿時元都再遭宇羅擴廓之變，民生喪亂，守備多不設。元主徘徊歎息曰：「今日豈可復作徽欽，遂決計北徙。」左丞相失烈門、知樞密院事黑厮等皆勸固守京城，不聽。命淮王帖木兒不花監國，丞相慶童畱守。是夜三鼓，元主及后妃太子開建德門，由居庸北走。如上都。八月二日庚午，徐達等進師取元都。至齊化門，將士填濠登城而入。達登齊化門樓，執其監門宗室淮王帖木兒不花及太尉中書左丞相慶童。平章迭兒必失、朴賽不花、右丞相張康伯、御史中丞滿川等戮之。并獲宣府鎮南威順諸王子六人及玉印二。成宗玉璽一封、府庫圖籍寶物及故宮殿門，以兵守之。宮人妃主令其宦寺護視。號令士卒無侵暴。人民安堵。達下令：「凡元朝大小諸臣皆令送告身於官署。民籍中違者有罰。」元翰林待制黃殷仕欲投井爲其僕所守，乃給僕曰：「吾甚愧，何從得酒醉而出見可也。」其僕喜，入市取酒，殷仕遂投井死。左丞丁敬可總管郭允中皆死之。學士危

素寓僧寺。亦欲赴井。一僧止之曰。公死亡國史也。遂往見達。明日。順德守將吉右丞。胡參政。鄭參政。皆自西山來降。武德衛軍校。獲前樂安逃將。俞勝。及南參政張郎中等。達遣將赴京獻捷。仍命薛顯。傅友德。曹良臣。顧時等。將兵偵邏。古北諸隘口。甲戌。徐達遣人詣東昌。令韓政分兵守廣平。徐達遣指揮華雲龍。經理故元都。新築城垣。張興祖。徇永平。路下之。癸未。詔大將軍徐達。改飛熊衛爲大興。左衛。淮安爲大興右衛。樂安衛爲燕山左衛。濟甯衛爲燕山右衛。青州衛爲永清左衛。徐州五所爲永清右衛。留兵三萬人分隸六衛。命都督副使孫興祖。僉事華雲龍守北平。大將軍徐達。副將軍常遇春等。率大軍往取山西。二年二月庚辰。元丞相也速。侵通州。時城中守兵僅千人也。速萬騎營於白河。守將曹良臣謂其部下曰。吾兵少。不可與戰。彼衆雖多。然亡國之後。屢挫之兵。可以計破也。乃密遣指揮許勇等。於沿河舟中。各樹赤幟。互三十餘里。鉦鼓之聲相聞也。速望之。驚遁。大將軍達。承制遣楊璟等。還征唐州。先是鄧愈。下唐州。以宋指揮守之。尋。唐州兵亂。賊將老馬。劉及南陽郡縣。皆相應。事聞。故有是命。璟至南陽。攻唐州。一鼓破之。戮其首惡。南陽復平。六月元也速。復侵通州。上命常遇春。以所部軍。自鳳翔還禦之。復命李文忠爲偏將軍。副遇春。自北平往開平道。三河。經鹿兒嶺。過會州。敗元將江文清於錦川。得士馬以千數。次全甯。也速。復以兵迎戰。又敗之也。速遁。進攻大興州。文忠策其必走。乃分兵千餘爲八屯。伏其歸路也。速果夜遁。遇伏。大敗。走擒其丞相。脫大赤。遂帥兵道新開嶺。進攻開平。元主先已北走。追奔數百里。俘其宗王慶生。平章鼎住等。斬之。凡得將士萬人。車萬輛。馬三萬匹。牛五萬頭。薊北悉平。改元都爲北平府。谷應泰曰。高帝起淮右布衣。定鼎金陵。削平吳漢。奄有荆楚。開拓閩越。固已志靖中原之民。氣吞大河之

北矣。吳元年。遂命徐達。常遇春。大舉六師。奉辭伐罪。乃不鼓我朝銳。直搗幽燕。而先取山東。撤其屏蔽。轉戰河南。斷其羽翼。再取潼關。據其戶樞。然後彈丸孤城。所向必克。猶之酈生說漢。首下陳留。光武滅新。先收宛雒。蓋論事者。動言高皇之英武。而不知平生之謹慎也。至若虓虎之臣。貔貅之佐。莫不汗馬功高。風雲氣壯。以故塔兒灣之捷。河西務之捷。通州開平之捷。比之垓下合圍。悲歌四起。昆陽大戰。屋瓦皆飛。固宜開國承家。勒銘鐘鼎者矣。然夷考其時。大軍戡定者。猶少。先聲歸命者。更多。於是青徐各郡。千里扶攜。兗豫諸司。百城分潰。東河在平。小邑也。而降濟南。汴梁。巖城也。而亦降。馬德。陳乘。漢人也。而遁。忽林脫。目元種也。而亦遁。蓋以其時。乾綱廢弛。羣情竄散。柄臣尾大。既誅。帝后東宮。腦滿。擅討。儉邪。以至開河。起大業之愁。鼓楫。有海山之戲。又且列圖。素女。拱手望夷。日肆。淫淫。坐視瓦裂。太祖之興。豈非天之所啓乎。况乎禡牙北出。伐亂救民。屢詔軍中。勿妄誅戮。破都之日。市不易肆。彼以暴。吾以仁。彼以昏。吾以義。克紂都。而去殷弊。政入咸陽。而除秦苛法。從知天命之有歸。乃在人心之豫附矣。若乃會議。端明。棄同。甌脫。叔寶。全無心肝。紀侯。大去其國。審德。量力。吾何責焉。獨是伯顏入宋。妃后皆俘。明室破元。嬪嬙不御。忠厚開基。又何必天道之好還也。

卷九

略定秦晉

太祖洪武元年。元將李思齊。張良弼。聞王師下河南。卽駐兵潼關以拒。旣而火焚良弼營。思齊仍移軍退。

守葫蘆灘。遣其部將張德欽、薛飛守關。五月，都督同知馮宗異抵潼關。思齊棄輜重走鳳翔。良弼奔麟城。丙寅，宗異遂入潼關，引兵西至華州。元守將望風奔潰。先是，宗異下陝州，上遣使諭之曰：若克潼關，勿遽乘勝而西。今大將軍方有事北方，宜選將守關，以遏其援兵。爾且率師回汴梁。至是，五月庚午，徐達調僉事郭興將慶陽衛指揮于光、威武衛指揮金興旺守之。丙子，宗異回軍至陝州，與徐達俱還河南。八月，大將軍徐達、副將軍常遇春既定元都，受命帥師取山西。副將軍馮宗異、偏將軍湯和平、章楊璟俱從。大將軍徐達征討。九月乙丑，副將軍常遇春等下保定，畱指揮李傑守之。丁卯，下中山，以指揮董勳守之。遂帥師趨真定。元守將孫平章棄城走。十月戊辰，大將軍徐達遣廣武衛鎮撫劉聚守河間，兼領府事。副將軍馮宗異、偏將軍湯和由河南渡河，克武陟，下懷慶。元平章白鎖住棄城遁。兵至太行山，盤子城，破其關。元兵奔潰，進取澤州。元平章賀宗哲棄城遁，破磨盤寨，獲參政俞仁，戮之。進克潞州，分兵克雄州，以鎮撫程信守之。十一月癸丑，徐達克趙州，以參隨王成守之。右丞薛顯敗元脫帖木兒於石州，擴廓帖木兒遣其將韓札兒來攻澤州。楊璟、張彬往援之。遇元兵於韓店，大戰失利。十二月，大將軍徐達率諸軍進取太原，擴廓帖木兒敗走。擴廓帖木兒者，察罕帖木兒甥也。先是，察罕與羅山人李思齊起兵，擊賊元，授察罕汝甯、達魯花赤，察罕死，詔擴廓領父兵，封河南王。而李思齊亦在節制中。思齊自謂父行，與他將張良弼、孔興、脫列伯等皆欲異軍。思齊遂據整屋，良弼據麻臺，擴廓遣關保、虎林赤攻麻臺。李思齊、孔興、脫列伯皆與良弼合。元數趨擴廓出師，擴廓遣其弟脫因帖木兒及部將完者、貂高往山東，而自與思齊、良弼相攻一歲餘。元下詔與和解，擴廓殺詔使，拒命。遣兵據太原。元太子與關保、思齊、良弼諸軍

合夾攻澤。復削奪擴廓爵邑。令思齊等誅之。擴廓退守平陽。關保據潞。潞二州與緬高合戰。而明兵已及河南。思齊良弼乃自詣擴廓。與結好。因解兵西歸。擴廓與緬高關保戰。擒之上。疏陳罪。元赦擴廓帖木兒。復其官。使出兵禦明。命右丞也速趨山東。禿魯出潼關。李思齊出七盤。金商圖復汴梁。然大將軍已至通入北平。順帝夜開建德門北走。仍命擴廓率兵出雁門關。由保安州經居庸關以攻北平。達聞之。謂諸將曰。王保保率師遠出。太原必虛。北平孫都督總六衛之師。足以鎮禦。我與汝等乘其不備。直抵太原。傾其巢穴。彼進不得戰。退無所依。此兵法所謂批吭擣虛也。若彼還軍救太原。則已爲我牽制。進退失利。必成擒矣。遂引兵徑進。擴廓旣至保安州。聞之。果還軍。前鋒萬騎突至。傅友德薛顯率敢死士數十騎衝卻之。擴廓軍於城西。壓明軍而陣。指揮郭英憑高望之。謂常遇春曰。彼兵多而不整。營大而無備。請夜劫之。遇春然其計。與徐達謀曰。我騎兵雖集。而步兵未至。何以能戰。莫若遣精騎夜劫其營。其衆可亂。衆亂。主將可縛也。會擴廓部將豁鼻馬潛遣人約降。且請爲內應。達大喜。遂乘夜襲之。先遣五十騎伏城東十里。以舉火鳴礮爲期。至夜。郭英率十餘騎潛入其營。舉火鳴礮。伏兵應之。遇春等兵大至。鼓噪相接。軍大潰。自相蹂躪。擴廓方然燭坐帳中。使兩童子執書侍。倉卒不知所出。亟納鞵。未竟。跌一足。踰帳後出。得驛馬從。十八騎遁去。達等勒兵進營城西。豁鼻馬以其將校降。得兵四萬人。馬四萬餘匹。擴廓奔大同。遇春率兵追至忻州。不及。得行人汪河還。擴廓走甘肅。庚午。徐達遣傅友德薛顯將步騎邀擊賀宗哲於石州。敗之。以戴復初署霍州。丁玉明署忻州。蔣應宗署崞州。翁子奇守大石。副將軍馮宗異西至猗氏。擒元右丞賈成。甲戌。進攻平陽。擒元右丞李茂。下之。參政陸聚率兵攻車子寨。及鳳山。成山。帖山三寨。降之。復取故

關山寨。承天寨。宗異進攻絳州。克之。擒元右丞田保。徐伯昌。獲將士五百人。陽曲皮皮等十寨頭目。各以其衆詣大將軍徐達營降。

二年春正月。詔免北平。燕南。山東。山西。河東。河南。潼關。唐鄧。光恩等處稅糧。甲寅。副將軍常遇春帥師攻大同。庚申。兵至大同。元守將竹貞棄城走。擒知院于陳等八十餘人。參政傅友德將兵屯朔州。右丞薛顯攻下潞州。桃花寨。大將軍徐達遣參政陸聚分兵守井陘。散關。聚進攻承天寨。克之。癸亥。遣使賫敕往山西諭諸將曰。近者大夫湯和定浙左。平閩中。平章楊璟靖湖湘。定廣西。班師還朝。未有定賞。以大將軍等滅元未還故也。於是遣諸偏將從大將軍征進。楊璟兵出澤潞。中道與賊相拒。雖少算。以累軍。此亦兵家常事。且太原得此爲掎綴。以分其勢。今定左副將軍馮宗異居遇春之下。偏將軍湯和居宗異之下。偏將軍楊璟居和之下。協力同心。剪除餘寇。二月。大將軍徐達師次河中。副將軍常遇春。馮宗異先渡河趨陝西。三月乙未。元鄜城守將副樞施成詣軍門降。徐達仍令成守之。庚子。徐達師至鹿臺。遂入奉元路。先是李思齊據鳳翔。副將欽穆。薛飛等守關中。張思道與孔興。脫伯列。金牌張龍濟民。李景春等駐鹿臺。以衛奉元。至是大兵入關。思道等先三日由野口遁去。達遣都督僉事郭興將輕騎擣奉元。而自率大軍繼進。渡涇渭。至三陵坡。父老千餘迎降。達按兵遣左丞周凱入城撫諭。明日。整兵入。改奉元路爲西安府。以夏德署府事。留耿炳文守之。炳文在長安修築涇陽。洪渠諸堰。十萬一千餘丈。民便利之。大軍西征。供億繁急。炳文輸餉五千石赴鞏昌。軍食賴以足。達師之至鹿臺也。元陝西行省平章哈麻圖棄奉元。走整屋。爲民兵所殺。平章歪頭。西臺治書侍御史王遁武去。復降。斬之。西臺御史桑哥失里守關家洞。

達遣攻之。勢窮促，不屈。與妻子俱投崖死。左丞拜秦古逃入終南山。郎中王可仰藥死。檢校阿失不花自縊死。三原尹朱春與其妻亦俱投崖死。時關中饑，上聞，命戶賜米一石，繼又命赴孟津倉，戶給米二石，民大悅。癸卯，常遇春、馮宗異等帥師發陝西，進克鳳翔。初，李思齊之奔鳳翔也，上以書諭之曰：「前者遣使通問，至今未還，豈所使非人，忤足下而留之與？抑元使適至，不能隱而殺之？若然，亦時勢之常。」大丈夫當磊磊落落，豈以小嫌介意哉？夫堅甲利兵，深溝高壘，必欲竭力抗我軍，不知竟欲何爲？昔足下在秦中，兵衆地險，雖有張思道專尚詐力，孔興等自爲保守，擴廓以兵出沒其閒，然皆非勍敵。足下此時不能圖秦，自王已失此機，今中原全爲我有，向與足下相爲掎角者，皆披靡竄伏。足下以孤軍相持，徒傷物命，終無所益。厚德者豈爲是哉？朕知足下鳳翔不守，則必深入沙漠，以圖後舉。然非我族類，其心必異。倘中原相從之衆，以塞地荒涼，一旦變生肘腋，妻孥不能相保矣。且足下本汝南之英，祖宗墳墓所在，深思遠慮，獨不及此乎？誠能以信相許，翻然來歸，當以漢竇融之禮相報。否則非朕所知也。思齊得書，有降意。其麾下誘之與西入吐蕃，思齊惑之。至是大兵至鳳翔，思齊懼，遂帥所部奔臨洮。參政博友德克鳳州，以指揮張能守之。夏四月丙寅，大將軍徐達會諸將於鳳翔，議所向。諸將咸以張思道之才不如李思齊，慶陽易於臨洮，欲先由豳州取慶陽，然後從隴西攻臨洮。達曰：「不然。思道城險而兵悍，未易猝拔。臨洮之地，西通番戎，北界河湟，取之其人，足以備戰鬪。其土地所產，足以供軍儲。今以大軍蹙之，思齊不西走胡，則束手就縛矣。臨洮既克，則旁郡自下。諸將然之。達乃留御史大夫湯和守營壘，輜重，令指揮金興旺、余思明等守鳳翔，遂移師趨隴州，克之。尋至秦州，馬跑泉元守將呂德、張義遁去。遣都督僉事陳德追獲之，以合

肥衛千戶王宏將兵五百守隴州。張規魯將兵千人守秦州。達進師至鞏昌。元守將梁子中、汪靈、眞保等出降。以都督僉事郭興守之。遣馮宗異攻臨洮。顧時、戴德攻蘭州。丁丑。顧時等克蘭州。以指揮韓溫守之。馮宗異師至臨洮。李思齊窮迫。舉城降。宗異遣人送徐達營。達遣指揮韋正等守之。臨洮捷奏至。上覽畢。即遣使諭徐達曰。李思齊旣降。宜進攻慶陽。甯夏。張思道兄弟多詐。若來降。當審處之。勿墮其計也。李思齊入見。命爲江西行省左丞。不之官。食祿於京師。己卯。徐達師入安定州。以降將陳宗聚署州事。調青州右衛官軍守之。克會州。以參隨黎宗文署州事。指揮陳壽守之。乙酉。徐達師入靖甯州。遂徇下隆德縣。五月丁酉。大將軍徐達師至蕭關。下平涼。指揮朱明克延安。以明守之。辛丑。元將張良臣以慶陽降。初。張思道在慶陽。聞王師克臨洮。懼走甯夏。而使其弟張良臣、平章姚暉守慶陽。思道至甯夏。與金牌張等俱爲擴廓帖木兒所執。徐達旣下平涼。即謀取慶陽。令湯和遣兵往涇州。別遣指揮張煥將騎兵偵邏慶陽。遣人招良臣。良臣以其兄被執。遂以城降。良臣驍勇善戰。軍中呼爲小平章。戊申。良臣復據慶陽叛。初。良臣之降也。遣其花參政詣徐達。獻軍民數目。尋又遣知院李克仁、葛八來獻馬數。達遣右丞薛顯將騎兵五千人同克仁等赴慶陽。比良臣出迎。匍伏道左。佯爲卑下。以示歸順。薄暮。即以兵劫營。顯等不意其叛。爲所衝潰。指揮張煥被執。顯被傷走還。達聞語。諸將曰。帝明見萬里外。今日之事。果如前言。然良臣之叛。祇取滅亡耳。當與諸公戮力剪之。於是馮宗異、傅友德聞良臣叛。帥師自臨洮至涇州。湯和亦帥所部來會。達恐其黨相扇爲聲援。乃先遣兵抄其出入。俞通源將精騎略其西。顧時略其北。傅友德略其東。陳德略其南。達帥諸將趨慶陽。以兵四面圍其城。良臣出兵挑戰。達麾兵擊敗之。六月辛巳。達督諸軍攻

慶陽張良臣遣竹苛往甯夏求援於王保保獲斬之仍以參隨王敬祖將兵守彭原。秋七月甲午徐達遣降將李茂等將騎兵千人往隆德秦安等處收捕未附頭目杜伯不花羅左丞相等。辛亥王保保部將韓札兒陷原州指揮陳壽死之徐達聞報與馮宗異傅友德議以驛馬關當其衝遣右丞徐禮將兵據之又遣指揮葉石真守彭原調指揮韋正守邠州傅友德辭顯駐靈州扼之宗異復與徐達謀曰今大軍圍慶陽張良臣雖困未能遽下王保保欲爲良臣聲援故令札兒攻原州欲以救慶陽請得移軍逼關以扼原州彼無所施矣達然之宗異遂以其軍西臨驛馬關去慶陽三十里而軍是夜札兒復攻陷涇州丁千戶退保靈臺縣宗異自驛馬關引兵赴之札兒走追至邠州又走宜祿遁去宗異還屯驛馬關。八月丙寅慶陽小元帥謀納款爲張良臣所囚城中降者夜劫小元帥出詣大將軍營達受之令軍中無虐降者。先是七月己亥常遇春還次柳河川得疾卒上令偏將軍李文忠代領其衆至是詔文忠自北平會師攻慶陽行至太原會元將脫列伯等攻大同甚急文忠謂左丞趙庸等曰吾與公等受命而來闕外之事有利於國專之可也今大同被攻甚急若候進止豈不失機衆皆諾遂由代出雁門至馬邑適游騎數千奄至猝遇我師與戰敗之擒其平章劉帖木兒進至白楊門又擒黠寇四大王時天雨雪文忠疑有伏乃身引數騎入山察視之前軍已駐營去敵五十里文忠至遽令遷之復前至五里營於漫地阻水先遣由閒道達大同使知之元將脫列伯悉銳來攻文忠令將士秣馬蓐食閉營不出先以兩營誘敵督令死戰自寅至辰前營報數至文忠不爲動良久度其饑疲乃分軍爲左右翼身當前鋒奮擊大敗之生擒脫列伯降其衆萬餘獲馬匹輜重甚衆縛脫列伯詣軍門文忠解其縛與之共食遂進兵東勝州至莽哥倉

而還。先是元主北走屯蓋里。命脫列伯孔興以重兵攻大同。欲圖恢復。至是脫列伯被擒。孔興走綏德。其部將復斬之來降。元主知事不濟無復南向矣。脫列伯至京師。上曰。彼各爲其主耳。釋之。賜冠帶衣服。癸未。徐達克慶陽。先是徐達率諸將四面圍其城。張良臣出戰東門。顧時擊敗之。復自西門出戰。馮宗異禦之。走還。良臣登城呼呂德約降。達不聽。初。良臣之叛也。自以其城險。而下有井泉。可據以守。其兵精悍。養子七人皆善戰。軍中語曰。不怕金牌張。惟怕七條鎗。又其兄思道與王保保爲聲援。賀宗哲韓札兒爲羽翼。姚暉葛行爲爪牙。故欲拒守。以圖大功。及明師列營城下。困之。良臣不得逞。數出戰。俱不利。遣人赴甯夏求援。輒被獲。內外音問不通。糧餉乏絕。至煮人汁和泥嚙之。姚暉熊左丞胡知院知事不濟開門納降。達勒兵自北門入。良臣父子俱投井中。引出斬之。明日。誅良臣黨柴知院等二百餘人。以都督僉事陳德守之。先是賀宗哲攻鳳翔。或隧地。或突至甕城。凡十五日。指揮金興旺周興嬰城固守。至是慶陽下。宗哲乃引去。徐達聞宗哲由六盤山遁。遣顧時薛顯傅友德將萬騎追之。宗哲以其衆掠蘭州。達遣馮宗異率步騎一萬七千道靖甯擊之。宗哲由迭烈孫渡河遁去。宗異乃率所部還。九月。大將軍徐達御史大夫湯和發平涼還京師。以右副將軍馮宗異總制軍事。十二月。王保保知大將軍南還。自甘肅以兵襲蘭州。奄至城下。守將指揮張溫會諸將校曰。彼悉衆襲我。我兵寡。難與爲敵。然彼遠來。未識我衆寡。乘暮擊之。可挫其鋒。彼不退。則固守以待援。於是整兵出戰。保保兵少。卻溫斂兵入城。保保進圍之。溫堅守不與戰。鷹揚衛指揮于光守鞏昌。將兵來援。至蘭州之馬蘭灘。卒遇保保兵。戰敗。被執。至蘭州城下。使呼張將軍出降。光大呼曰。我不幸被執。公等但堅守。徐總兵將大軍至矣。敵怒。批其頰。遂遇害。城中聞光言。守

益堅。夜二鼓，保保以兵登城，千戶朱祐醉不能起，巡卒擊卻之。溫屢設方略，乘怠破其兵，保保圍數月不利。且聞大軍至，遂引去。溫執朱祐，數其罪，將殺之。知事朱友文諫曰：「當其時，斬祐以徇，所謂軍法從事也。今賊已退，誅之無及，徒有專殺罪。」溫杖而釋之。事聞，陸溫都督僉事，贈恤于光。

谷應泰曰：「初，太祖之北伐也，直趨青濟者，正兵；而西扼潼關者，疑兵也。故以徐中山大軍，搗彼胸腹，而以馮宗異孤軍，綴彼聲援。原未嘗命其仰關而攻，躍馬而入也。此時元將之守晉者，爲擴廓帖木，其守秦者爲李思齊，張思道皆庸才耳。擴廓之應詔入援，出雁門，經居庸，其算神矣。而太原根本空國而去，一軍奄至，巢覆穴傾。此晉之所以亡也。李思齊負百二之險，藉建瓴之勢，乃不捲甲出關，以斷河南要路，而反徘徊關內，風鶴驚奔，使宗異拱手而取河西，安驅而入華陽。此秦之所以亡也。假令擴廓留守，如孟德之保三城，思齊出關，如趙奢之爭閼與，則明之重兵深入雲代，既壓其前，韓魏又議其後，妥權未去也。速重來，安危之機，正未可必也。奈何徐常諸將，由豫入晉，自晉達秦，擴廓不戰於北平，而戰於晉陽；思齊不戰於河津，而戰於崞底；譬之腐鼠孤雛，直坐受人縛耳。然又不特此也。思齊以父行，倔強擴廓以私讐，稱兵大敵在前，而兩虎自鬪，遂使明兵直入河南，迅掃上谷。方始解甲西歸，輸誠結好，憂卞莊之刺，講廉藺之歡，嗚呼晚矣！以予觀之，唐起冀方，混一區宇，秦據雍州，蠶食六國，而元末武臣坐失事機，怯於公戰，正所謂倔強秦莽之閒，遷延歲月之命，豈真仗義勤王有深圖遠算之概哉！至於韓札兒之河湟剽掠，張良臣之慶陽復叛，而明師乃能西臨驛馬，東叩大同，出奇無窮，料敵制勝，則晉室之表裏山河，秦地之隩區陸海，安得不爲新主資也！」

卷十

故元遺兵

太祖洪武三年春正月癸巳。上以王保保爲西北邊患。命右丞相信國公徐達爲征北大將軍。浙江行省平章李文忠爲左副將軍。都督馮勝爲右副將軍。御史大夫鄧愈爲左副將軍。湯和爲右副將軍。往征沙漠。上問諸將曰。元主遲留塞外。王保保近以孤軍犯我蘭州。其志欲僥倖尺寸之利。不滅不已。卿等出師當何先。諸將皆曰。保保之寇邊者。以元主之猶在也。若以師直取元主。則保保失勢。可不戰而降。上曰。王保保方以兵臨邊。今舍彼而取元主。是忘近而趨遠。失緩急之宜。非計之善。吾意欲分兵二道。一令大將軍自潼關出西安。搗定西。以取王保保。一令左副將軍出居庸。入沙漠。以追元主。使彼此自救。不暇應援。元主遠居沙漠。不意吾師之至。如孤豚之遇猛虎。取之必矣。事有一舉而兩得者。此是也。諸將皆曰。善。遂受命而行。二月。北平守禦華雲龍克雲州。獲元平章火兒忽答。右丞哈海等。大同指揮金朝興克東勝州。獲元平章荆麟等。大同都督同知汪興祖克武州。朔州。獲元知院馬廣等。夏四月。大將軍徐達率師出安定。初。達師至平西。王保保退。屯車道峴。達遣左副將軍鄧愈立柵逼之。至是出安定。駐沈兒峪口。與王保保隔深溝而壘。一日數戰。王保保發兵千餘人。由閒道從東山下。潛劫東南壘。一軍皆驚。左丞胡德濟倉卒不知所出。達率親兵擊之。斬東南壘趙指揮及將校數人。以徇。軍中股栗。明日。整衆出戰。諸軍爭奮。遂大敗保保兵於川北。亂冢閒。擒元郟王文濟王及國公閻思孝。平章韓札兒。虎林赤。嚴奉先。李景昌。

察罕不花等官一千八百六十五人。將校士卒八萬四千五百餘人。獲馬萬五千二百八十餘匹。駱駝驢羸雜畜稱是。保保僅與其妻子數人從古城北遁去。至黃河。得流木以渡。遂由甯夏奔和林。都督郭英追至甯夏。不及而還。保保至和林。元嗣主愛猷識理達臘復任以事。徐達以胡德濟失律。械送京師。上念其舊勞。特赦之。仍遣使諭達曰。將軍欲效衛青。不斬蘇建。獨不見穰苴之待莊賈乎。胡左丞失律。正當就軍中戮之。今歸之朝廷。朝廷必議其功過。彼常守信州。救諸全。皆有功。不忍卽加誅。懼將軍緣此緩其軍法。是用遣使卽軍中諭意。五月丁酉。左副將軍李文忠。左丞趙庸。師出野狐嶺。擒元平章祝眞。進敗元太尉蠻子。平章沙不丁。朶耳只。八刺等於白海之駱駝山。遂次開平。元平章上都罕等降。都督孫興祖率燕山右衛指揮平定大興。左衛指揮龐禮。兵次三不刺川。遇元兵力戰。皆沒於五郎口。海甯衛指揮副使孫虎率兵至落馬河。及元太尉買驢戰死之。癸卯。李文忠克應昌。文忠率師趨應昌。未至百餘里。獲元騎。問之。知四月二十八日庚申。君已殂。文忠督兵兼程而進。遇元兵一戰。敗之。追至應昌。圍其城。獲元主孫買的里八剌。并后妃。宮人。諸王。省院達官。士卒等。宋代玉璽金寶一十五。宣和殿玉圖書一。玉冊二。鎮國玉帶。玉斧各一。及駝馬牛羊無算。惟太子愛猷識理達臘與數十騎遁去。文忠率精騎追之。至北慶州。不及而還。道興州。降其兵民三萬七千人。至紅羅山。又降其兵民萬六千餘人。捷聞至京師。百官稱賀。上命禮部榜示。凡經仕元者不與。又以庚申君不戰而奔。克知天命。諡曰順帝。上又自爲祭文曰。生死廢興。非一時之偶然。乃天地之定數。古之聖賢。於是四者。一或臨之。不爲之變。何也。蓋知天命而不惑者也。君之祖宗。昔起沙漠。彎弓矢入我中國。橫行天下。九彝八蠻。盡皆歸之。非天命不至此。及君之父子。正當垂

衣守成之時。而盜生汝潁。華夏騷然。號令不行。以致失國。此人事歟。天道歟。朕於其時。非有三軍六師。以威天下。乃代君家而爲民主。亦莫非天命也。曩者君主沙漠。朕主中國。君與羣臣。乃固執不移。致邊警數興。今聞君沒於沙漠。朕用惻然。特遣人致弔。奠以牲醴。以享爾靈。爾其鑒之。六月。李文忠遣人送俘獲元諸王買的里八剌等。及其寶冊。至京師。省臣楊憲等。請以買的里八剌獻俘於廟。寶冊令百官具朝服進。上曰。寶冊貯之庫。不必進也。古者雖有獻俘之禮。武王伐殷。曾用之乎。憲對曰。武王事殆不可知。唐太宗嘗行之。上曰。太宗是待王世充。若遇隋之子孫。恐不行此禮。元人入主中國。百年之內。生齒甚繁。家給人足。朕之祖先。亦領享其太平。雖古有獻俘之禮。不忍加之。祇令服本俗衣。以朝朝畢。賜以中國衣冠。就令謝恩。復謂憲曰。故國之妃朝於君者。元有此禮。不必效之。亦令衣本俗衣。於中宮朝見。見畢。賜中國之服。亦令謝恩。乙亥。買的里八剌朝見奉天殿。其母及妃朝見坤甯宮。俱賜以中國服。及賜第宅於龍山。封買的里八剌爲崇禮侯。丁丑。頒平定沙漠詔於天下。仍遣使賫詔諭安南高麗占城。是日百官表賀。上諭之曰。當元之季。君則晏安。臣則跋扈。國用不經。征斂日促。天怒人怨。盜賊蜂起。天下已非元有矣。朕取天下於羣雄。非取天下於元氏。向使元君克畏天命。不自暇逸。其臣各盡乃職。罔敢驕奢。天下豪傑。其得乘隙而起耶。遣使詔諭元宗室部落臣民。元宗室四大王初遁入靜樂崑崙山中。結寨自固。至是率衆寇武州。太原指揮程桂等擊敗之。追至龍尾莊。四大王遁走。獲其三大王。脫忽的帖木兒送京師。乙酉。左副將軍鄧愈招諭吐番。元陝西行省吐番宣慰使何鎮南普詣軍門降。鎮西武諸王卜納刺亦以吐番諸部來降。追元豫王至西黃河。抵墨松林。殺阿撒禿干。於是河州以西。甘朶烏思藏等部皆來歸。征哨極甘

肅西北數千里始還。九月命指揮韋正守河州。正初至河州。城邑空虛。人骨山積。將士見之。咸欲棄去。正語之曰。正受命。率公等出鎮邊陲。當不避艱險。報國恩。今既至此。無故棄去。一旦遂生戎心。其誰禦之。吾與若等死亡無地。妻孥不得相保。毋甯死於王事乎。於是衆感激如命。正日夜撫循軍民。河州遂爲樂土。冬十一月壬辰。大將軍徐達。左副將軍李文忠等還至龍江。車駕出勞於江上。

四年春正月。命魏國公徐達往北平。訓練軍士。繕治城池。給守邊將士衣。二月甲戌。元遼陽守將平章劉益降。先是遣斷事黃儔詔遼陽諸處官民。帥衆歸附。益遂以遼東州郡地圖并籍兵馬錢糧之數。遣右丞董遵僉院楊賢奉表來降。詔置遼東衛指揮使司。以益爲指揮同知。未幾。元平章洪保保。馬彥輩共謀殺益。張良佐。房暘復擒彥輩殺之。保保走納哈出營。遼東之衆因推良佐。暘權衛事。至是。良佐以聞。并遣使貢馬。上元所授印章。敕金牌。獻賊殺劉益逆黨。仍上其事於中書省。曰。本衛地方遼遠。僻處海隅。肘腋之間。皆爲敵境。元平章高家奴固守遼陽山寨。知院哈刺張屯駐瀋陽古城。開元則有丞相也速之。兵金山則有太尉納哈出之衆。彼此相依。互爲聲援。今洪保保逃往其營。必有構兵之釁。乞留斷事吳立鎮撫軍民。先將逆黨八丹知院僧兒械送京師。詔以良佐。暘爲遼東衛指揮僉事。魏國公徐達徙北平山後之民三萬五千八百戶散處衛府。籍爲軍者給衣糧。籍爲民者給田以耕。凡已降而內徙者三萬四千五十六戶。尋命達自北平往山西操練士馬。秋七月。遼東衛奏元納哈出據金山爲邊患。遣黃儔賈書諭之曰。比者元綱解紐。紅巾起於汝穎。羣盜徧於中原。僭名號者繼出。小明王稱帝於亳。徐真一稱帝於蘄。陳友諒稱帝於九江。張士誠稱王於姑蘇。明玉珍稱帝於西蜀。擁兵數萬。割據中原。垂二十年。朕本

淮民爲羣雄所逼。集衆渡江。與將軍會於太平。比待他俘。特加禮遇。且知將軍爲名家。特釋北歸。今又十七年矣。朕見羣雄無成。遣兵四出。北平中原。南定閩粵。東取方氏。西收巴蜀。四帝一王。皆爲俘馘。元君奔亡。華夏悉定。此天命。非人力也。近聞將軍居金山。大張威令。吾兵亦守遼左。與將軍旌旗相望。將軍若能遣使通問。貢獻姑容。就彼順其水草。自守一方。不然。大廈將傾。非一木可支。釁之後先。惟將軍自思之。儻至金山。納哈出拘留不還。置遼東都指揮使司。以馬雲、葉旺爲都指揮使。吳泉、馮祥爲同知。王德爲僉事。總轄遼東諸衛軍馬。上以劉益之變。納哈出未附。特命雲等鎮之。雲等由登萊渡海。駐兵金州。招降元參政葉廷秀。攻走平章高家奴。遂進至遼東。完城繕兵。一方遂安。命靖海侯吳禎帥舟師運餉遼東。淮安侯華雲龍統兵至雲州。諜知元平章僧家奴營於牙頭。夜遣精兵襲之。突入其營。擒僧家奴。盡俘其衆。獲駝馬四百餘匹。進至上都大石岸。攻破劉學士寨。擊敗驢兒國公於高州武平。悉衆北奔。又遣指揮孫恭等帥兵口北。招諭惠王伯都。不花。儲王伯顏。不花。宗王子蠻伯帖木兒等。冬十二月丙戌。遣人送伯都。不花等至京。上命賜第宅。襲衣什器等物。仍月給錢米有差。

五年春正月乙丑。詔賜魏國公徐達。曹國公李文忠。宋國公馮勝。交趾弓五十。彤弓百。庚午。命達爲征北大將軍。出中路。文忠爲左副將軍。出東路。勝爲右副將軍。出西路。三道並進。以清沙漠。中路由鴈門趨和林。東路由居庸出應昌。西路由金蘭趨甘肅。三月。徐達抵山西境。都督藍玉爲前鋒。敗保保游騎於野馬川。丁卯。復敗保保於土刺河。保保遁。與賀宗哲合。而拒我師於嶺北。時師數發。弮而心輕敵。驟與之戰。不利。死者萬餘人。達固壘而救之。故徹侯功臣無死者。保保亦不敢入塞。偏將軍湯和遇別部於斷頭山。

亦敗。馮勝師次蘭州。傅友德率驍騎五千爲前鋒直趨西涼。遇元失刺罕兵擊敗之。追至永昌。又敗元太尉朵兒只巴於忽刺罕口。大獲其輜重牛馬。進至掃林山。勝等師亦至。共擊元兵。走之。友德手射死其平章卜花。追斬四百餘人。降太尉鎖納兒加。平章管著等。夏六月戊寅。元將上都驢知大軍至。率所部吏民八百三十餘戶迎降。勝撫輯其民。留兵守之。進至亦集乃路。守將卜顏帖木兒全城降。師至別駕山。元岐王朵兒只班遁去。追獲其平章長加奴等二十七人。及馬駝牛羊十餘萬。友德復引兵至瓜沙州。又敗其兵。獲金銀印馬駝牛羊二萬而還。李文忠率都督何文輝等兵至口溫。敵聞之。夜棄營遁。獲其牛馬輜重無算。遂進至合刺莽來。敵部落驚潰。復進至臚胸河。文忠下令曰。兵貴神速。千里襲人。難以負重。乃留輜重臚胸河。令部將韓政等守之。士卒人持二十日糧。兼程而進。至土刺河。元太師哈刺章蠻子悉衆渡河。留其妻子北嚮。而嚴騎以待。文忠督兵力戰。戰數合。敵稍卻。復進至阿魯渾河。敵兵益衆。搏戰不已。文忠馬中流矢。急下馬持短兵接戰。從者劉義直前奮擊。以身蔽文忠。指揮李榮見事急。以所乘馬授文忠。自奪敵騎乘之。文忠得馬。氣益厲。據鞍橫槊。麾衆更進。於是士卒鼓勇。皆殊死戰。敵敗走。逐北至騁海。敵兵益大集。文忠乃勒兵據險自固。而多張疑兵。縱所獲馬畜於野。示以閑暇。居三日。敵疑有伏。不敢逼。稍稍引去。文忠亦解而歸。迷失道。至桑哥兒麻。乏水。渴死者甚衆。文忠患之。忽所乘馬跑地長鳴。泉水湧出。士馬賴以俱濟。是役也。顧時與文忠分道入沙漠。糧且盡。遇元兵。士足疲乏。不能戰。時奮勇獨引麾下數百人躍馬大呼。擊敗之。掠其輜重牛馬還。軍復大振。曹良臣至阿魯渾河。孤軍深入。敗沒。驍騎衛指揮使周顯振武指揮同知常榮。神策衛指揮使張耀俱死焉。秋七月乙未。文忠以所獲故元官屬子孫及軍

士家屬一千八百四十餘人送至京師。九月丁巳，吳禎遣送遼東元平章高家奴，知樞密院高大方，同僉高世舉，張海馬，遼陽路總管高賦等至京師。冬十一月壬申，命賞甘肅京衛軍士，時馮勝等以匿所獲贏馬牛羊不賞，上曰：「祭遵爲將，憂國奉公，曹彬平江南，所載惟圖書，汝等當法古人，省躬以補過。」諸將叩頭謝。十二月壬寅，遣使賫書與元幼主，又與元臣劉仲德、朱彥德書曰：「人臣致身於君，貴有終始。至正之君蒙塵而崩，幼主初立，朝之大臣無不叛去，獨二生竭力事之，誠可嘉尚。今特遣使者諭君數事，且令取其子買的里八剌歸，二生宜察之，毋教人以倔強絕父子之道。爾君宗祀不絕，二生家族亦可長保。如其不然，六軍出討，旌旗蔽塞於陰山，二生身膏草野，固奇男子事也。或不能殉國，偷生免死，何面目與朕相見，惟熟慮之。」

六年春正月壬子，命魏國公徐達、曹國公李文忠往山西北平，練兵防邊。夏四月，華雲龍奏上諸關防守事宜，東自永平、薊州、密雲，西至五灰嶺、外隘口，通一百二十一處，相去約二千二百里，其王平口至官坐嶺關隘有九，約去五百餘里，俱衝要之地，並宜設兵守之。紫荆關及蘆花山嶺尤爲要路，宜設千戶所禦守。從之。六月甲申，武朔等州邊警，時大將軍徐達駐師臨清，報至，遣臨江侯陳德、鞏昌侯郭興將兵擊之。秋八月丙子，河州土門峽邊警，千戶王才戰死。陳德、郭興兵至答刺海子口，遇敵騎，擊敗之，生擒其同僉興都等，斬首六百級，獲駝馬牛羊千頭，餘衆潰去。冬十月，涼州屢有邊患，都指揮宋晟率兵討之，追至亦集乃之地，斬其渠帥也速兒，殺獲甚衆，又招降其國公吳把都等。十一月壬子，徐達等擊元兵於懷柔三角村，擒其平章康同僉、李文忠出朔州，擒元太尉伯顏不花。

七年春正月曹國公李文忠敗敵於白登俘其國公孛羅帖木兒文忠駐代縣遣將各出擒平章陳安禮木厝飛於三不剌斬其將珍珠刺於順甯陽門二月癸亥臨江侯陳德獲韃韃禿魯迷失等九十七人於會甯諸處六安侯王志獲韃韃一百餘人於朔州諸處俱送京師三月丁卯敕大將軍徐達分布六安侯王志南雄侯趙庸駐山西滎陽侯楊璟汝南侯梅思祖駐北平屯種達與李文忠馮勝還京師乙亥蘭州八里麻民郭買的叛誘番兵入寇詔立賞格購捕之蘭州衛遣其兄著沙與其弟火石歹往招之郭買的不從著沙火石歹夜斬其首以歸事聞上曰買的罪固當死然爲兄弟者告之不從執之而已手自刃之有乖大倫若賞之非所以令天下也但以所獲牛馬給之夏四月己亥都督僉事藍玉率兵攻興和元將脫因帖木兒棄城走丙辰命宋國公馮勝衛國公鄧愈中山侯湯和鞏昌侯郭興復鎮北邊戊午都督僉事金朝興等獲元太尉盧伯顏不花平章帖木兒不花等於黑城子等處河南都指揮使繆道獲元參政等官於聖山兒等處而還秋七月曹國公李文忠督兵攻大甯高州火石崖克之斬元宗王朵朶失里擒承旨百家奴八月丙辰追擊之於豐州擒其帥十二人部衆百餘人馬駝牛羊萬計魯王敗走追斬之獲其妃蒙哥及其印并斬其司徒答俊海平章把都知院忽都等九月丁丑遣崇禮侯買的里八剌扎還上謂廷臣曰崇禮侯買的里八剌南來五載能無父母鄉土之情於是厚禮而歸之選老成宦者二人送行復遣其父愛猷識理達臘織文金綺錦衣各一襲辭行上諭之曰爾本元君子孫國亡就俘曩卽欲遣歸以爾年幼道里遼遠恐不能達今旣長成朕不忍令爾久客於此故特遣歸見爾父母以全骨肉之恩又諭二宦者曰此爾君之嗣也不幸至此長途跋涉爾善視之因遣書諭元主愛猷識理達

臘。

八年夏五月。詔永嘉侯朱亮祖同潁川侯傅友德率師往北平備邊。八月。故元王保保卒。保保自定西之敗。走和林。元嗣主復任以政。後從徙金山之北。至是卒於合刺那海之衙庭。其妻毛氏亦自縊死。上一日宴。謂羣臣曰。天下誰爲男子者。皆對曰。無如常國公。所將不過萬人。而橫行無畱陣。上乃拊髀歎曰。是遇春耶。我得而臣之。我竟無以臣王保保。真男子也。竟冊其妹爲秦王妃。冬十二月癸巳。元太尉納哈出寇遼東。守將馬雲葉旺擊敗之。先是。上敕遼東都司曰。今天寒冰結。敵必乘時入寇。宜堅壁清野。以待之。慎勿與戰。使其進無可得。退有後慮。伏兵險阻。扼其歸路。可坐而致也。至是。果入寇。都指揮使馬雲等探知。納哈出將至。命蓋州衛指揮吳立。張良佐等嚴兵城守。敵至。堅壁勿戰。及納哈出至。見城中備禦嚴。不敢攻。乃越蓋州城。徑趨金州。時金州城垣未完。軍士寡少。指揮韋富。王勝等聞寇至。督勵士卒分守諸城門。選精銳登城以禦之。納哈出裨將乃刺吾自恃其驍勇。率數百騎徑至城下挑戰。城上發弩射之。乃刺吾被傷。悶絕。遂獲之。寇勢大沮。富等復縱兵出擊。納哈出不利。慮援兵且至。引兵退走。以蓋州有備。不敢經其城。乃由城南十五外沿祚河道歸。都指揮葉旺策其將退。先引兵趨祚河。自連雲島至窟陀塞。十餘里。緣河疊冰爲牆。以水淋之。經宿皆凝。沍。隱然如城。藏釘板於沙中。設陷馬阱於平地。伏兵以待之。命老弱卷旗登兩山閒。戒以聞礮。卽豎旗。馬雲於城中亦立大旗。令定遼前衛指揮周鶚及吳立等各嚴兵。以候。四顧寂若無人。已而敵騎至。旺等俟其過城南。礮發。伏兵四起。兩山旌旗蔽空。鼓聲雷動。矢石雨下。納哈出倉皇北奔。趨連雲島。遇冰城。馬不能前。皆陷入窞中。遂大潰。雲於城中亦出兵追擊。至將軍山畢。

張河斬獫及凍死者甚衆。旺等復乘勝追至豬兒峪。獲其士馬無算。納哈出僅以身免。

九年春正月。擢馬雲葉旺都督僉事。命中山侯湯和。潁川侯傅友德帥師往延安防邊。諭曰。自古重邊防。邊安則中國無事。而四裔可以坐制。今延安地控西北。元騎聚散不常。若待其入寇而後防之。則塞上之民必將受害。卿等至邊上。當嚴爲之備。雖不見敵。常若臨敵。三月。湯和等至延安。元伯顏帖木兒遣人請和。上聞之。召諸將悉還。獨留傅友德屯邊以備之。敕諭友德曰。無事而請降。兵法所戒。爾其慎之。四月。伯顏帖木兒果乘閒犯邊。傅友德設伏大敗之。俘其衆。獲馬畜輜重無算。元平章兀納歹遂執伯顏帖木兒以降。十一月。吐番所部川藏邀咀烏思藏使者掠其輜重。命衛國公鄧愈爲征西將軍。都督沐英爲副將軍。率兵討之。

十年夏四月。鄧愈。沐英等至西番。分兵爲三道。併力齊入番部川藏。覆其巢穴。窮追至崑崙山。斬首無算。俘男女一萬。獲馬五千。牛羊十三萬。十一月。都督濮貞征高麗。被執不屈。死之。已而高麗龍川鄭白等來降。敕遼東守將潘敬葉旺勿納以破其奸。

十一年春正月。北平警。五月。元嗣君愛猷識理達臘殂。子脫古思帖木兒立。秋八月。西番洮州等處戎寇亂。命西平侯沐英爲征西將軍。率都督藍玉等統兵征之。首取甘朵。降其萬戶乞迭迦。平其部落。俘獲無算。洮州十八族番鬼據納鄰七站之地。英進兵擊之。

十二年春二月戊戌。命曹國公李文忠往河州。岷州。臨洮諸處督理軍務。西平侯沐英兵至洮州。番寇三副史阿卜商等率衆遁去。我軍追擊之。獲積石州叛逃土官阿昌七站土官失納等。斬之。遂於東隴山。

南川度地勢築城戍守遣使請事宜上曰洮州西番門戶今築城戍守是扼其咽喉也遂命置洮州衛設官領兵守之英進擊西番擒三副使瘦子等班師夏六月命都督馬雲率兵征大甯

十三年春三月元國公火脫赤知院愛足屯和林爲邊患命西平侯沐英總陝西兵討之由亦集乃路渡黃河歷賀蘭山涉流沙至其境去營五十里英下令分軍爲四一襲其背二掩其左右英率驍騎當其前夜銜枚以進合而圍之火脫赤等駭惑不知所措皆俯首就擒獲其全部以歸

十四年春正月戊子元平章乃兒不花等寇邊命大將軍徐達左右副將軍湯和傅友德率師討之夏四月達率諸將出塞友德爲前鋒軍至北黃河敵駭遁友德選輕騎夜襲灰山克之擒其平章別里不花太史文通等沐英領兵出古北口獨當一面擣高州嵩州全甯諸部過驢駒河獲知院李宣并其部衆而還十五年五月上聞士卒海運多溺死者命羣臣議遼東屯田

十八年二月國子監祭酒宋訥獻守邊策大略謂備邊在足兵足兵在屯田宜選諸將軍智謀勇略者數人每將以東西五百里爲制隨其高下立法分屯布列緣邊之地遠近相望首尾相應遇敵則戰寇去則耕此長久之法也上嘉納之

二十年春正月壬子朔命宋國公馮勝爲大將軍穎國公傅友德爲左副將軍永昌侯藍玉爲右副將軍南雄侯趙庸定遠侯王弼爲左參將東川侯胡海武定侯郭英爲右參將率師北征納哈出上諭勝等曰納哈出詭詐未易得其虛實爾等且駐師通州遣人覘其出沒彼若在慶州宜以輕騎掩其不備既克慶州則以全師徑膺金山出納哈出不意必可擒矣旣而復遣前所獲乃刺吾北還以書諭納哈出等二月

甲申馮勝等兵至通州。遣邊騎出松亭關。聞敵騎有屯慶州者。遣右副將軍盧玉將輜輳出關。平章果來擒其子不蘭奚。獲人馬而還。三月辛未。馮勝等率師出松亭關。築大甯。寬河。會州。富峪。四城。遂駐兵大甯。夏六月庚午。馮勝留兵五萬守大甯。率大軍趨金山。辛未。上敕諭勝等。納哈出去金山未遠。以兵促之。勢必來降。且元主謂我得志無意窮追。必順逐水草。往來黑山魚海之間。掩其無備。彼衆可盡獲也。丁酉。勝等至遼河東。獲納哈出屯卒三百人。馬四百餘匹。遂進師駐金山之西。時乃刺吾還至松花河。納哈出見之。大驚。相勞問。乃刺吾因諭以朝廷送還之意。納哈出喜。即遣其左丞劉探馬赤。參政張德裕。至軍門獻馬。且因以覘我。勝遣人送赴京師。乃刺吾復備以撫恤之恩語其衆。由是部落多有降意。時臨江侯陳鏞所部與大將軍異道相失。陷敵死之。丁未。勝等率師踰金山。至女直若屯。納哈出部將全國公觀童來降。初。納哈出分兵爲三營。一曰榆林深處。一曰養鵝莊。一曰龍安。一曰禿河。輕里富厚。畜牧蕃息。元主數招之。不往。至是大將軍逼之。納哈出計窮。乃刺吾因勸之降。納哈出猶豫未決。勝遣馬指揮往諭之。納哈出乃遣使至大將軍營。陽爲納款。而更覘兵勢。勝即遣藍玉往。一禿河受之。使還報。納哈出指天噴噴曰。天不復與我有此衆矣。遂率數百騎詣藍玉降。玉大喜。出酒與之飲。甚相歡。納哈出酌酒酬玉。玉解衣以衣之。謂曰。請服此而後飲。納哈出不肯服。玉亦持酒不飲。爭讓久之。納哈出取酒澆地。願其下咄咄語。將脫去。時鄭國公常茂在座。其麾下趙指揮者解胡語。以告茂。茂直前搏之。納哈出大驚。起就馬。茂拔刀砍之。傷臂不得去。耿忠遂以衆擁之見勝。納哈出所部妻子將士凡十餘萬。在松花河北。聞納哈出被傷。遂驚潰。餘衆欲來追。勝遣前降將觀童往諭之。於是其衆悉降。凡四萬餘。羊馬駝驢輜重互百餘里。納

哈出有二姪不肯降。勝遣人諭之。乃折弓矢於地。亦來降。勝以禮遇。納哈出加慰諭。令耿忠與同寢食。遣使奏捷。奏常茂驚潰。降衆遂班師。悉以納哈出來降將卒妻子及其輜重俱南行。仍以都督濮英將騎兵三千爲殿。初納哈出之降也。餘衆驚潰者皆竄匿。及聞大軍還。以其降衆俱行。甚恨之。乃設伏於途。候大軍過而邀之。英等後至。伏發。猝爲所乘。衆寡不敵。英馬蹶被執。英絕食不言。乘閒剖腹而死。秋七月丁酉。納哈出所部營王失刺八禿等來降。八月壬子。上聞馮勝等在軍中多不律。遣使戒諭之。癸酉。馮勝械常茂至京。茂勝之壻也。勝每於衆中卑折之。茂不能堪。出不遜語。勝銜之。及納哈出降。而衆驚潰。勝乃歸咎於茂。奏之。茂至。陳所以降。納哈出之故。上曰。如爾言。勝亦不得無罪。命收其總兵印。召勝還。令永昌侯藍玉總兵代之。九月戊寅。納哈出至京。封爲海西侯。詔左副將軍傅友德徧集新附軍士。駐兵大甯防寇。丁未。以永昌侯藍玉爲大將軍。延平侯唐勝宗。武定侯郭英爲左右副將軍。都督僉事耿忠。孫恪爲左右參將。率兵討殘元。肅清沙漠。冬十一月甲午。藍玉奏元丞相哈刺章乃兒不花遁入和林。乞進兵勦滅。許之。

二十一年夏四月。藍玉率師自大甯進至慶州。聞元主脫古思帖木兒在捕魚兒海。聞道兼程而進。乙卯。師至百眼井。去捕魚兒海四十餘里。哨不見敵。玉欲引兵還。王弼曰。吾等提十萬衆。深入沙漠。未見敵。而班師。何以復命。玉然之。弼復請戒諸軍皆穴地而纓。毋令敵望見烟火。師遂進。丙辰。至捕魚兒海南。飲馬。偵知元主營在海東北八十餘里。玉以弼爲前鋒。直薄其營。敵始謂我軍乏水草。不能深入。不設備。又大風揚沙。晝晦。軍行皆不知。元主方欲北行。整軍馬皆北向。忽大軍至。其太尉蠻子倉卒拒戰。擊敗之。殺蠻

子其衆遂降。元主脫古思帖木兒與其太子天保奴知院捏怯來丞相失烈門數十騎遁去。玉率精騎追之。不及。獲其次子地保奴等六十四人。及故太子必里禿妃并公主等五十九人。其詹事院同知脫因帖木兒將逃。失馬竄草間。擒之。及追獲吳王朵兒只代王達里麻平章八蘭等二千九百九十四人。軍士男女七萬七千三十七口。得寶璽圖書金銀印章馬駝牛羊車輛各籍數入奏。聚其甲兵悉焚之。遂班師。二十二年夏五月癸巳。置太甯福餘。朵顏三衛於兀良哈。以故元歸附阿禮失里爲太甯衛指揮使。塔賓帖木兒爲指揮同知。海撒奚爲福餘衛指揮同知。脫魯忽察爲朵顏衛指揮同知。各領所部以安畜牧。秋七月。元也速迭兒弑其主脫古思帖木兒。立坤帖木兒。其部屬皆奔散。元裔日微。二十三年春正月。命傅友德爲大將軍。率列侯趙庸曹興王弼孫恪等赴北平。訓練軍馬。聽燕王節制。出征沙漠。敕王弼以山西聽晉王節制。三月。燕王率傅友德等出古北口。哨得乃兒不花等駐牧迪都。遂進兵。適大雪。諸將欲止。燕王曰。天雨雪。彼不虞我至。宜乘雪速進。癸巳。遂抵迪都。隔一磧。敵不知也。乃先遣指揮觀童徑詣其營。觀童與乃兒不花有舊。至則相抱持泣。倉卒之頃。我師已壓其營。衆大驚。乃兒不花等欲上馬走。觀童諭以燕王至。毋恐。乃兒不花與俱詣軍門降。燕王降辭色待之。賜之酒。慰諭遣還。乃兒不花大喜過望。於是悉收其部落馬駝牛羊而還。報捷京師。上大喜曰。肅清沙漠者燕王也。二十四年春三月。元遼王阿札失理寇邊。命穎國公傅友德率列侯郭英等討之。五月。至哈者舍利王道友德遽下令班師。敵聞信之。越二日。忽趨師深入。六月。至黑嶺鴉山等處。洮兒河獲人口馬匹。駐師金鞍子山。七月。復征黑嶺寒山。至磨鎌子海蘭尖山。追其渠札都。深入黑松林之地。野人所居。熊皮山。追達達

兀刺罕掩襲其衆。大獲而還。八月。哈密寇邊。命都督宋晟。劉真率師討之。九月。晟等破哈密。擒其王子別列怯。王桑里失哥。知院岳山等。殺其國公阿朶只。俘衆一千三百人。二十五年夏四月。涼國公藍玉率將士追逃寇祁者孫。遂進征西番罕東之地。五月。藍玉兵至罕東。遣都督宋晟等徇阿真州。土渠合咎等遁去。尋奉詔移兵討建昌叛帥月魯帖木兒。秋七月癸未。四川都指揮使瞿能率兵至雙狼寨。攻破之。擒僞千戶段太平等。其衆大潰。月魯帖木兒遁去。能督兵追捕。進攻托落等寨。拔之。月魯帖木兒復遁。能轉戰而前。破水寨關。及上廬寨。進至打沖河三里所。與月魯帖木兒遇。大戰。破走之。俘其衆五百餘人。溺死者千計。獲牛馬無算。官軍入德昌。知府安德渡打沖河遁去。能遂調都指揮同知陶凱分兵入普濟州。搜捕之。獲駕橋於打沖河。遣指揮李華引兵追托落寨。餘孽進至水西。斬月魯帖木兒把事七人。其截路寨土渠長沙納的等皆中兵死。能還攻天星。臥漂諸寨。皆克之。先後俘殺千八百餘人。月魯帖木兒復遁入柏興州。九月。罕西番叛入寇。命都督宋晟總兵討平之。十一月甲午。藍玉兵次柏興州。遣百戶毛海以計誘致月魯帖木兒。并其子胖。其衆悉降。送月魯帖木兒至京師。伏誅。玉奏四川之境。地曠山險。控扼西番。宜增置屯衛。順慶府鎮禦巴梁。大行諸縣。其保甯千戶所北通連雲棧。宜改爲衛。漢州灌縣西連松茂。礪黎。當土番出入之地。眉州控制馬湖。建昌嘉定。接山。都長九寨。俱爲要道。皆宜置軍衛。下羣臣議行之。都督周興帥兵討元逆臣也速迭兒。興追至徹徹兒山。破之。十二月壬申。馮勝等奉命率列侯籍太原。平陽民爲兵伍。置衛屯田。東勝立五衛。大同立五衛。大同迤東立五衛。衛五千六百人。

二十九年春三月甯王權言騎兵巡塞見有脫輻遺道上恐敵兵往來有盜邊之舉上曰狡寇多奸此必示弱誘我軍耳於是敕燕王選精卒抵大甯沿河南北覘北兵所在隨宜掩擊甲子燕王率諸軍北至徹徹兒山遇元兵與戰擒其將索林帖木兒等數十人追至兀良哈禿城遇兀刺兀海戰敗之

三十年春正月命耿炳文郭英巡西北備邊五月己巳敕晉燕代遼甯谷六王勒兵備邊戒勿輕戰俟敵分散驕怠邀截要路擊之

三十一年夏四月命燕王率諸王防邊敕曰北騎南行不寇大甯卽襲開平可召西涼都指揮張文傑莊得開平都督宋眞宋晟遼東武定侯郭英等皆以兵會遼王以護衛軍悉數北出山西北平亦然令郭英宋眞宋晟翼於左莊得張文傑翼於右爾與代遼甯谷五王居其中彼此相護首尾相救兵法示飢而實飽外鈍而內精爾其察之五月戊午敕左軍都督楊文往北平并燕谷甯三府精銳往開平從燕王防邊敕郭英總兵往遼東隨遼王屯開平迤北險要防邊仍聽燕王節制乙亥命燕王總帥諸王防邊敕曰朕觀成周之時天下治矣周公告成王曰詰爾戎兵安不忘危之道也朕之諸子汝獨才智秦晉已薨汝實爲長攘外安內非汝而誰爾其總率諸王相機度勢用防邊患奠安黎民以答上天之心以副吾付託之意其敬慎之毋怠

谷應泰曰塞下之險東起開鐵北歷喜峯西互偏頭五灰相距二千二百里而遙乃欲阻長城而堵之列亭障而蔽之設險守國蓋其難哉若夫高皇之定天下也與漢唐異漢唐之主所稱勝國之孽者悉中原之人耳乾符一御醜類盡殲寶籙攸歸餘胤革面然而漢圖白登唐苦突厥內地旣輯邊患乘之強弩之

末。殊未可以易視也。又況順帝北出漁陽。旋輿大漠。整復故都。不失舊物。元亡而實未始亡耳。於時忽答一軍駐雲州。王保保一軍駐沈兒峪。納哈出一軍駐金山。失喇罕一軍駐西涼。引弓之士不下百萬衆也。歸附之部落不下數千里也。資裝鎧仗。尙賴而用也。駝馬牛羊尙全而有也。假令躡林祭纛。大舉報仇。田單一鼓而下齊。申胥七日而救楚。豈得云情歸之氣沒。世不復歟。然而太祖之攻之也。分兵二道。一出西安。以搗定西。一出居庸。以搗沙漠。則雲中雁門之勢斷矣。及其再舉也。分兵三路。徐達出中路。李文忠出東路。馮勝出西路。則盧龍榆關之援又絕矣。而且築東勝之險。是南仲之城朔方也。設屯田之利。是充國之守金城也。宜乎左丞右帥東底開平。鄧愈沐英西臨弱水。雖貳師之入大宛。張騫之通屬國。其長駕遠馭。未有若斯之極也。厥後應昌之捷。買的就俘。武平之戰。惠儲歸命。於是犂幕南而無庭。過陰山而慟哭。元氏舊墟。幾乎盡矣。至於設伏馬陵。揚水疏勒。則桑哥兒之跑地。橐駝塞之冰城。似有神助。功亦爛焉。若夫燕雲割棄。四百餘年。石晉以來。復還版圖。豈景純定限。南北更合。將衛霍樹績。王者無外耶。

卷十一

太祖平夏

元順帝至正十五年春。徐壽輝將明玉珍據成都。玉珍隨州人。世農家。身長八尺。目重瞳。以信義爲鄉黨所服。初聞徐壽輝兵起。集鄉兵屯於青山。結柵自固。未幾降於壽輝。授元帥。隸倪文俊麾下。鎮沔陽。與元將哈林禿戰湖中。飛矢中右目。微眇。十四年。以兵千人槳斗船五十湖夔而上。時青巾盜李喜喜聚兵川

蜀元義兵元帥楊漢以兵五千禦之。屯平西。右丞相完者都鎮重慶。置酒飲漢。欲殺之。漢覺脫身走。順流下巫峽。遇玉珍。訟之。且言重慶可取狀。玉珍未決。萬戶戴壽曰。攻重慶事。濟據蜀。不濟歸。無損也。從之。遂進克其城。完者都遁。父老迎入城。玉珍禁侵掠。市肆晏然。降者相繼。

十八年。完者都自果州來攻重慶。屯嘉定之大佛寺。明玉珍使明三禦之。明三。黃陂人。驍勇善戰。玉珍弟畜之。後復姓名曰萬勝。又密遣猛士夜服陳劫烏斗山寨。擣嘉定。皆下之。惟大佛寺未下。玉珍親濟師。旬日城潰。完者都參政趙資。平章郎歹革皆死之。人稱三忠。道出瀘州。自訪元進士劉禎。喜曰。吾得一孔明也。

二十一年。明玉珍稱隴蜀王。初。玉珍謀討陳友諒。乃整兵守夔關。不與通。復立廟以祀徐壽輝。至是。遂自稱隴蜀王。

二十二年春三月。明玉珍僭稱帝於蜀。國號大夏。改元天統。倣周制。設六卿。又置翰林院。承旨學士。國子監等官。賦稅十取其一。開廷試。置雅樂。供郊祀之祭。皆劉禎爲也。

二十三年。明玉珍遣萬勝等三道攻雲南。梁王孛羅走金馬山。勝入城據之。孛羅復集衆來攻。勝敗於關灘。引還。

二十四年。萬勝攻興元。敗還。鄒興克巴州。

二十五年九月。夏主明玉珍以萬勝戴壽爲左右丞相。遣參政江儼來通好。命都事孫養浩報之。是年萬勝取興元。

二十六年春三月夏主明玉珍卒年三十六玉珍頗節儉好文學蜀人安之子昇嗣昇年始十歲母彭氏同聽政改元開熙其都察院張文炳用事忌萬勝使玉珍義子明昭矯彭氏旨殺之勝夏驍將也兵無不一當百勝死夏以不競劉禎代爲丞相吳友仁移檄興兵昇命戴壽討之友仁曰不誅昭國必不安昭若朝誅吾當夕解壽乃奏誅昭友仁入朝謝罪不問

九月己亥夏主明昇遣使來聘使者自言其國東有瞿塘三峽之險北有劍閣棧道之阻古人謂一夫守之百人莫過而西控成都沃壤千里財富利饒實天府之國太祖笑曰蜀人不以修德保民爲本而恃山川之險誇其富饒此豈自天而降耶使者退太祖因語侍臣曰吾平日爲事祇要務實不尙浮僞此人不能稱述其主之善而但誇其國險固失奉使之職矣吾常遣使四方戒其謹於言語勿爲誇大恐遺笑於人如蜀使者之謬妄當以爲戒也遣參知政事蔡哲往報蜀哲挾畫工同往圖其山川險易以獻太祖覽而嘉之遂爲取道伐蜀之張本

太祖洪武元年冬十二月遣使以書諭夏主明昇

二年秋八月夏主明昇遣使來貢王師平關陝蜀人震恐戴壽謂昇曰大明天子遣將用兵所向無敵以王保保李思齊強盛竟莫能禦況吾蜀乎倘一旦有警計將安出吳友仁曰蜀地非中原比設有緩急據險可守爲今之計莫若外假交好以緩敵內修武事以自強昇從其言遣使修貢上賜璽書答之曰朕歷觀古有蜀者如公孫述李特王建孟知祥輩皆能乘機進取而善守之道未聞今足下必圖所以善守可也朕連年出師所向克捷皆諸將用命故能成功遠勞致禮益見厚意因使者還姑以此復冬十月壬

戊遣平章楊璟諭明昇奉國入覲。昇牽於羣議不能決。璟將還。復以書曉之曰。古者同力度德。同德度義。無可度焉。則爲順圖。足下自謂瞿塘劍閣一夫負戈。萬卒誰何。此皆不達時變相謬誤。足下自度孰與劉備。諸葛孔明。然僅僅能自保。足下疆場南不過播州。北不過興元。王師一至。所爲足下謀者。各自爲計。足下奉老母安歸乎。足下卽冲幼。當亦痛心老母。順逆之圖。度之而已。昇不能從。

三年夏五月。大將軍徐達旣出安定。走王保保。乃遣左副將軍鄧愈招撫土番。而自帥所部攻興元。以傅友德爲前鋒。自秦州南出一百八渡。至略陽。擒故元平章蔡琳。遂入沔州。分遣裨將金興旺等由鳳翔入連雲棧。合攻興元。興元守將劉思忠。知院金慶祥迎降。留金興旺。張龍守之。達還軍西安。秋七月。蜀將吳友仁寇興元。守將金興旺。張龍出兵擊卻之。明日。友仁復來攻。興旺與戰。面中流矢。拔矢再戰。斬首數百。時城中守兵纔三千。友仁兵三萬。興旺以衆寡不敵。斂兵入城。遣使閉道走寶雞。請援兵。友仁圍城。決濠填塹。攻益急。興旺嬰城拒守。發巨礮礮石。敵兵多死傷。時徐達在西安。得報卽帥師還屯益門鎮。先遣傅友德領兵三千徑趨黃龍江。夜襲木槽關。攻斗山砦。友德令軍中人持十炬然於山上。友仁軍望見大驚。乘夜遁。

四年春正月丁亥。上親祀上下神祇。告伐明昇。命中山侯湯和爲征西將軍。江夏侯周德興爲左副將軍。德慶侯廖永忠爲右副將軍。滎陽侯楊璟。都督僉事葉昇等率京衛荆湘舟師。由瞿塘趨重慶。潁川侯傅友德爲前將軍。濟甯侯顧時爲左副將軍。都督僉事何文輝等率河南陝西步騎。由秦隴趨成都。上諭和等曰。今天下大定。四海奠安。惟川蜀未平耳。朕以明玉珍嘗遣使修好。存事大之禮。憫明昇稚弱。不忍加

兵數遣使開諭。冀其覺悟。昇乃惑於羣議。反以兵犯吾興元。不可不討。今命卿等率水陸大軍分道並進。首尾攻之。使彼疲於奔命。勢當必克。但師行之際。在肅行伍。嚴紀律。以懷降附。無肆殺掠。昔王全斌之事。可以爲戒。卿等慎之。諸將陛辭。上復密諭。傅友德曰。蜀人聞吾西伐。必悉其精銳東守瞿塘。北阻金牛。以拒我師。彼謂地險。吾兵難至。若出其意外。直擣階文。門戶旣隳。腹心自潰。兵貴神速。但患卿等不勇耳。友德頓首受命。仍命宋國公馮宗異往陝西修城池。衛國公鄧愈往襄陽訓練軍馬。運糧餉以給征蜀軍士。

二月。江夏侯周德興。指揮胡海等進兵。取蜀之龍伏隘。進奪覃屋。溫陽關。中山侯湯和率師克歸州。李逢春烽火山寨。分遣南雄侯趙庸。宣甯侯曹良臣帥兵取桑植。容美洞。會周德興合攻茅岡。覃屋寨。克之。

三月。平章楊璟進次瞿塘。不利。先是蜀人自謂瞿塘天險。其平章莫仁壽守之。以鐵索橫斷關口。及聞王師臨境。又遣左丞戴壽。平章鄒興。副樞飛天張等益兵爲固守計。壽等於鐵索外。北倚羊角山。南倚南城寨。鑿兩岸壁。引纜爲飛橋。三平以木板置礮石木竿鐵銃其上。傍橋兩岸復置礮以拒王師。至是。璟師次夔州大溪口。遣指揮韋權率兵出赤甲山。以逼夔州。指揮李某出白鹽山下。逼夔府南岸。以攻南城寨。璟與都督僉事王簡出大溪口。進攻瞿塘扼江之衆。璟戰不利。赤甲白鹽之師亦退還歸州。潁川侯傅友德受命馳至陝。集諸道兵。揚言出金牛。而使人潛覘。知青州果陽空虛。階文雖有兵壘。而守備單弱。於是引兵趨陳倉。選精銳五千爲前鋒。攀援山谷。晝夜兼行。大軍繼之。夏四月丙戌。直抵階州。蜀守將平章丁世真率衆來拒。友德擊敗之。生擒其將雙刀王等十八人。世真遁去。遂克階州。進至文州。距城三十里。蜀人斷白龍江橋以阻我師。友德督兵修橋以渡。至五里關。蜀平章丁世真復集兵據險。都督同知汪興

祖驪馬直前中飛石死。友德怒奮兵急擊破之。世眞僅以數騎遁去。遂拔文州。庚寅。上以湯和傅友德等伐蜀。三月。未得捷報。命永嘉侯朱亮祖爲右副將軍。帥師助之。丁酉。傅友德下青州。果陽。畱指揮潘忠守之。進兵徇江油。彰明二縣。下之。癸卯。遂趨緜州。友德選精銳鼓行而前。別遣都督僉事藍玉夜襲其壘。蜀守將向大亨軍驚擾。達旦。友德麾兵乘之。俄大風起。諸軍乘風縱擊。蜀兵大敗。遂克緜州。龍驤衛指揮史鑑死之。大亨走保漢州。友德至漢州。阻水不得渡。乃命軍中造戰艦百餘艘。時蜀人雖失階文。猶恃漢水自固。及聞我師造舟進取。乃益震恐。五月己卯。戰艦成。友德將進兵漢州。欲以軍事達湯和。而山川懸隔。適江水暴漲。乃以木牌數千。大書克階文。緜州日月。投漢江。順流而下。蜀守者見之。爲之解體。初。蜀人命丞相戴壽。太尉吳友仁等。悉衆守瞿塘。以扼三峽之險。及聞友德破階文。擣江油。壽等乃與友仁分瞿塘守兵。還援漢州。以保成都。未至。而友德舟師已逼漢州。向大亨悉兵陣於城下。友德選驍騎擊敗之。旣而壽等兵至。友德下令諸將曰。彼勞師遠來。聞向大亨新敗。必洶洶可一戰克也。乃親帥師迎擊。壽等大敗之。六月壬午。遂拔漢州。壽與大亨走成都。臨江侯陳德追擊。又敗之。獲其卒三千餘人。馬三百匹。友仁走古城。友德乃以濟甯侯顧時守漢州。自將擊古城。又大敗其衆。殺獲二千餘人。并擒宣慰胡孔彰等。獲馬羸五百餘匹。友仁自古城遁還保甯。時湯和兵發歸州。進攻瞿塘關。以江水暴漲不得進。乃駐師大溪口。欲俟水稍平。上聞之。恐其逗遛緩事。而傅友德捷書適至。乃詔和曰。傅將軍率精銳冒險深入。克階文及青州。果陽。白水江之地。兵旣越險。次於平川。蜀人無險可恃。正當水陸竝進。使彼首尾受敵。疲於奔命。平蜀之機。正在今日。朕前日所以語爾者。獨不記憶乎。何怯之甚也。詔至。廖永忠遂帥所部先進。和

猶遲疑未決。會得友德木牌於江流。迺進兵。自白鹽山伐木開道。由紙牌坊溪趨夔州。永忠兵先至。舊夔州蜀平章周興副樞飛天張等出兵拒戰。戊子。永忠分軍爲前後陣。軍旣交出。後軍兩翼夾擊之。興等大敗。明日。復併兵攻之。擒其元帥龔興。殺溺死者甚衆。辛卯。永忠進兵瞿塘關。永忠以山峻水急。而蜀人設鐵索飛橋。橫據關口。我舟不得上。乃密遣壯士數百人。舁小舟。踰山度關。出其上流。人持糗糧。帶水筒。以禦饑渴。山多草木。令將士皆衣青蓑衣。魚貫山巖石間。蜀人不覺也。度已至。乃率精銳出黑葉渡。分爲兩道。夜五鼓。以一軍攻其陸寨。一軍攻其水寨。攻水寨將士皆以鐵裹船頭。置火器而前。黎明。蜀人盡銳來拒。永忠先破其陸寨。旣而將士舁舟出江者。一時俱發上流。揚旗鼓譟而下。蜀人出不意。大駭。而下流之師。亦擁舟急擊。發火礮。火筒夾攻。大破之。鄒興中火箭死。遂焚其三橋。斷其橫江索。擒同僉蔣達等八十餘人。斬首千餘級。溺死者無算。飛天張鐵頭張等皆遁去。永忠入夔州。明日。湯和兵始至。永忠乃與分道竝進。和率步騎。永忠率舟師。約會於重慶。戊戌。蜀平章丁世真陷文州。先是。傅友德克文州。留指揮朱顯忠守之。世真合番寇數萬來攻。顯忠拒卻之。其趙元帥復與世真合兵攻城。城中食且盡。外援不至。部下皆曰。與其陷死地。孰若出城求生路乎。顯忠厲聲曰。爲將守城。城存與存。城亡與亡。豈有求活將軍耶。詰旦。世真攻益急。顯忠出東門拒戰。而世真復攻西門。日且暮。顯忠被創。裹創決戰。力不支。城破。死之。千戶王均諒被執不屈。蜀人磔之於文州東門。初。顯忠領士卒七百人。及城破。僅百餘人。旣而友德調兵來援。世真棄城走。事聞。恤顯忠。均諒家。夏守金州九龍山寨。平章俞思忠率官屬軍民二千三百餘人詣友德軍門降。獻良馬千匹。友德遣人送思忠至京。上命還其馬。賜第居京師。世真復率餘黨寇秦州。攻圍五

十餘日。城中食盡。括牛畜以食軍。友德調兵來援。擊走之。世眞逃竄山巖。自以拒敵官軍。殺傷者多。懼不敢出。夜宿梓潼廟中。爲帳下小校所殺。及蜀平。小校赴京言狀。上曰。小校殺本官。非義也不賞。廖永忠帥舟師自夔州乘勝抵重慶。沿江州縣望風奔附。次銅鑼峽。明昇與右丞劉仁等大懼。仁勸明昇奔成都。其母彭氏泣曰。事勢如此。縱往成都。不過延命旦夕。何益。仁曰。然則奈何。彭氏曰。大軍入蜀。勢如破竹。今城中軍民雖數萬。皆膽破心怖。豈能效力。若殿之出戰。死傷必多。亦終不免也。不如早降。以免生靈於鋒鏑。明昇遂遣使詣永忠軍。全城納款。永忠以湯和軍未至。辭不受。癸卯。湯和至重慶。會永忠以兵駐朝天門外。是日。明昇面縛銜璧。與母彭氏及其右丞劉仁等奉表詣軍門。和受璧。永忠解縛。承制撫慰。下令將士不得侵掠。撫諭戴壽。向大亨等家。令其子弟持書往成都招諭。遣指揮萬德送明昇等。并降表於京師。朱亮祖兵亦至。秋七月。傅友德兵圍成都。戴壽向大亨等出戰。以象載甲士列於陣前。友德命前鋒以火器衝之。象卻走。壽兵躡藉死者甚衆。會湯和遣人報重慶之捷。壽等亦得家書。聞重慶已降。而室家皆完。乃籍府庫倉廩。遣其子詣軍門納款。友德許之。翼日庚申。壽率其屬降。友德整衆自東門入。得士馬三萬分。兵會朱亮祖。徇州縣之未附者。壬戌。重慶知州尹善清拒戰。擊敗。斬之。判官王貴華率父老降。壽大享既降。至夔峽。皆鑿舟自沈死。八月。上遣使諭湯和等曰。爲將貴審機而重料敵。今全蜀已下。惟吳友仁尙據保甯。偷旦夕之命。乘機而取之。此破竹之勢。無不克者。將軍徘徊不進。何也。吾付將軍以大任。而臨事往往逗撓如此。何以總軍政寄國事乎。和聞詔。遣周德興會傅友德克其城。執友仁送京師。誅之。蜀地悉平。明昇至京師。廷臣上言。宋乾德閒。孟昶降。有叩頭伏罪禮。上曰。昶奢淫自恣。昇幼孽自臣。下可免。

其伏地禮封昇爲歸義侯。居第京師。已而投昇於高麗。金曹國公李文忠經理四川。文忠以成都舊城卑隘。增築新城。高壘深池。規制略備。時傅友德駐兵保甯。湯和駐兵重慶。各遣人招輯番漢人民。及明氏潰亡。士卒來歸者。因籍其壯丁。丙子。置成都右中前後四衛分隸之。復置保甯守禦千戶所。調濠梁等衛官軍守之。十二月辛卯。賞平蜀將士傅友德。廖永忠。各白金二百五十兩。彩段二十表。榮陽侯楊璟。南雄侯趙庸。永嘉侯朱亮祖。不與賞。上親製平西蜀文紀。傅廖二將之功。

谷應泰曰。聞之名山大川。不封諸侯王公。設險用守厥國。而周都雒陽。則曰南望三塗。北望嶽鄙。有德易以王。無德易以亡。蓋古者賢明之主。在德不在險也。夫中國之得地險者。宜無過巴蜀。棧道揭其北。瀘水阻其西。表岷峨之天闕。帶二江之雙流。勇夫重閉。幾乎斗絕矣。而自古及今。敗亡相繼。俘縶入臣。罕有全者。則蜀之地險。固不足恃也。方夫元運垂終。羣雄竝起。明玉珍以隨州布衣。結寨青山。爲徐壽輝之外臣。倪文俊之守將。及文俊見殺於友諒。而遂奄有三巴。盜竊名字。比之劉宗下輦。而自王。公孫躍馬。而稱帝。功尤易易也。玉珍不以此時北趨子午。入叩關隴。南下夷陵。先窺漢沔。而但固守夔門。改元稱制。偏隅自割。坐待滅亡。此策之最下者。是則東之自守者。無過士誠。而西之自守者。無過玉珍也。方太祖之初。逐鹿中原。未遑外討。答書通聘。以待隗囂厚禮。卑辭以驕李密。而使者乃以張裔之口舌。誇蠶叢之形勝。井蛙坐大斯爲過矣。至於元都已沒。秦晉悉平。蜀道一隅。勢如黑子。乃始命鄒興。莫仁壽等。瞿塘阻水。鐵鎖橫關。丸泥墨守。不已晚乎。若夫太祖之伐蜀也。以湯和等舟師入峽。疾趨重慶。此正兵也。而傅友德一軍揚言發金牛。潛師取階文者。此奇兵也。夫鄧艾。緇入陰平。則緜竹之師不摧。而潰。吳漢襲至廣都。則城市之

橋可燒而斷。宜乎劉仁表詣軍門。明昇面縛銜璧而彭氏以爲繼。走成都。不過延命旦夕也。乃知桓溫既入李勢。告亡。全斌濟師。孟昶不祀。此張載勒銘於劍閣。左思致誠於蜀都。玉壘銅梁。險無足據矣。從此再駭效順。刁弼景從。枸醬出於番禺。竹杖來於大夏。版圖之盛固不必言。獨是功紀傳。廖文皆御製。楊璟以無績而不敍。小校以非義而輟賞。勸懲斯在。又非特平蜀之規耳。若夫明昇者。封侯歸義。居第京師。要領克全。母子相保。雖劉禪樂魏。身不生還。而望帝歸魂。死猶啼血。嗚呼。方西川僭號時。其爲寄生久矣。

卷十二

太祖平滇

太祖洪武五年春正月癸丑。遣翰林院待制王禕齋詔諭雲南。雲南古滇池地。南控交趾。北接土蕃。西擁諸甸。東以曲靖爲門戶。與蜀黔錯壤。麗江松潘。烏蠻窟益如犬牙。然戰國時。楚威王使將軍莊躡將兵循江上。略巴蜀黔中。西至滇池。以兵威定屬。楚歸報會。秦擊楚。巴黔道塞。遂以其衆王滇。變服從其俗。以長之。漢武帝元狩元年。彩雲見南方。遣使跡之。起於洱河。因寘雲南郡。諭滇王入朝。宣帝遣王褒求金馬碧鷄之神。蜀漢建興三年。諸葛亮南征。雍闓斬之。封其渠龍祐那爲部長。賜姓張氏。漸去山林。徙居平地。建城邑。務農桑。諸部於是始有姓氏。隋開皇中。爲史萬歲所破。唐武德。貞觀間。張氏弱。遜位。蒙氏號南詔。天寶七年。閣羅鳳反。敗節度使鮮於仲通。西洱河。後段氏有其地。段氏之先。威武郡人。改國號大理。宋太祖立王全斌下四川。請取大理。鑒唐之禍。以玉斧畫大渡河曰。此外非吾有也。由是雲南不被兵。段氏得長。

世焉。元世祖自臨洮過大渡河，經山谷二千里，至金沙江，乘革囊以濟，獲段興智，滅其國，乃以其子忽哥出爲雲南王，填之。仍錄段氏子姓守其土，忽哥死，封其子松山爲梁王。至正時，把匝刺瓦爾密嗣位，明玉珍一攻之不克，至是上旣平夏，乃遣使往諭之。

六年冬十二月，詔使王禕被殺於雲南。禕初至雲南，見元梁王君臣，諭以奉版圖歸職方，梁王不省，館於別室。數日，又曰：予將命遠來，非爲身謀朝廷，以雲南百萬生聚，不欲殲於鋒刃，曾不聞元綱解紐，陳友諒據荆湖，張士誠據吳會，陳友定據閩關，明玉珍據巴蜀，天兵下征，不四五年，悉膏斧鉞，惟爾元君北走，以死擴廓帖木兒之屬，或降或竄，曾無用武之地，當是時，先服者賞，後至者誅，乃今自料勇悍強獷，孰與陳張土地甲兵，孰與中國，天之所廢，誰能興之，不然，皇上遣一將軍，將龍驤百萬，會戰昆明池，爾猶魚游釜中，不亡何待？梁君臣相顧駭服，頗有降意，改館禕，厚待之。會元太子自立於沙漠，遣使脫脫自西番徵糧，雲南謀連兵拒我，脫脫胡知梁王有二心，欲迫殺朝使，以固其意，梁王持兩可，不決，匿禕民間，脫脫聞之，誚梁王曰：國家顛覆，不能救，反欲附他人耶？欲躍馬去，梁王不得已，出禕與脫脫相見，脫脫欲屈禕，禕罵曰：天命訖汝元，我朝實代之，燭火餘燼，尙欲與日月爭光乎？我將命使臣，豈爲爾屈？顧梁王曰：爾朝殺我，大兵夕至矣，竟被害，瘞地藏寺北，禕有王佐才，上嘗語曰：吾固知浙東有二儒，卿與宋濂耳，學問之博，卿不如濂，才思之雄，濂不如卿，後子紳走雲南，求遺骸，贈翰林學士，諡文節。

七年秋八月，遣元威順王子伯伯齋詔往諭雲南。

八年秋九月，命湖廣行省參政吳雲使雲南，上諭雲曰：今天下混一，四方賓服，獨雲南一隅未奉正朔，朕

欲以兵取之。恐勞師費財。重傷吾民。卿能爲朕作陸賈乎。雲對曰。雲南特其險遠。故阻聲教。臣奉陛下威德。曉以禍福。彼必順附。若冥頑不從。輿師未晚。遂遣雲行。時元梁王使其臣鐵知院等二十餘人使漠北。爲徐達所獲。送京師。上釋之。命與雲偕行。至雲南之沙糖口。鐵知院等謀曰。吾屬奉使不達。被執而還。罪必不免。於是共逼雲易服。詐爲元使。更制書以紿梁王。雲不從。鐵知院等知不可奪。遂殺之。

十四年秋九月壬午。命潁川侯傅友德爲征南將軍。永昌侯藍玉。西平侯沐英爲副將軍。帥師征雲南。列侯曹震。王弼。金朝興。都督郭英。張銓等皆從。上諭之曰。雲南自昔爲西南彝。至漢置吏。臣屬中國。今元之遺孽把匝刺瓦爾密等。自恃險遠。輒害使臣。在所必討。爾等行師之際。當知其山川形勢。以規進取。朕嘗覽輿圖。咨詢於衆。得其阨塞。取之之計。當自永甯先遣驍將別率一軍。以向烏撒。大軍繼自辰沅。以入普定。分據要害。迺進兵曲靖。曲靖雲南之噤喉。彼必併力於此。以抗我師。審察形勢。出奇制勝。正在於此。既下曲靖。三將軍以一人提兵向烏撒。應永甯之師。大軍直擣雲南。彼此牽制。使疲於奔命。破之必矣。雲南既克。宜分兵徑趨大理。先聲已振。勢將瓦解。其餘部落。可遣人招諭。不煩兵而下也。師行。上餞於龍江。旌旗蔽江而上。丁未。傅友德師至湖廣。分遣都督郭英。胡海洋。陳桓等帥兵五萬。由四川永寧趨烏撒。友德等率大兵由辰沅趨貴州。十二月辛酉。傅友德率藍玉。沐英等進攻普定。克之。羅鬼苗蠻犵狓望風降。至普安。復攻下之。乃留兵戍守。進兵曲靖。元梁王把匝刺瓦爾密聞明師下普定。遣司徒平章達里麻將精兵十餘萬屯曲靖。以拒我師。右副將軍沐英謂傅友德曰。彼謂我師疲於深入。未有虞心。若倍道疾趨。出其不意。破之必矣。上所謂出奇取勝者此也。友德是之。遂進師。丙寅。未至曲靖數里。忽大霧四塞。衝霧

而行。阻水則已。臨白石江矣。頃之霧霽。達里麻望見大驚。倉皇失措。友德卽欲濟師。英曰。我軍遠來。形勢旣露。固利速戰。然亟濟恐爲所扼。乃整師臨流。勢若欲渡。達里麻悉精銳扼水。英別遣數十人從下流潛渡。出其後。鳴金鼓。樹旗幟。達里麻急撤衆禦之。陣動。英乃拔劍督師。濟江以猛而善泅者先之。長刀蒙盾。破其前軍。敵氣索退數里而陣。我師畢濟。友德麾兵進薄之。矢石雨發。呼聲動天地。戰數合。英縱鐵騎擣其中堅。敵衆披靡。遂大敗。生擒達里麻。橫屍十餘里。俘其衆二萬。友德悉撫而縱之。使各歸業。蠻人見歸者皆喜慰。軍聲益振。遂平曲靖。留兵鎮其地。友德分遣藍玉。沐英率師趨雲南。而自以衆數萬向烏撒。爲郭英等聲援。壬申。元梁王把匝刺瓦爾密聞達里麻敗。棄城走入羅佐山。其右丞驢兒自曲靖馳歸。謂曰。事急矣。將柰何。於是把匝刺瓦爾密挈妻子與左丞達的驢兒俱入普寧州。忽納峇焚其龍衣。驅妻子俱赴滇池死。癸酉。藍玉。沐英等師至雲南之板橋。元右丞觀音保出降。明日。駐兵金馬山。故梁王閻監也。先帖木兒以金寶來獻。諸父老焚香出迎。玉等整衆入城。秋毫無犯。收梁王金印。并宮府符信圖籍。撫定其民。自九月朔出師。迄下雲南。僅百餘日。藍玉別遣曹震。王弼。金朝興等率兵二萬。分道進取。臨安諸路皆下之。沐英分兵趨烏撒。會友德。先是都督郭英等出永寧路。多險阻。諸將欲深入。英曰。破敵貴先聲。攻取必自近始。舍近趨遠。非策之上也。遂以兵攻赤水河。去河二十里爲營。時久雨。水暴漲。英曰。賊恃水漲。不意吾濟。下令諸軍。斬木造筏。夜半濟河。比曉。敵始覺。遂大驚潰。生擒阿客指蠻。雲南諸郡邑皆震。至是。友德自曲靖帥師循格孤山而南。直擣烏撒。元右丞實卜收兵屯赤水河。拒郭英等。友德大軍至。實卜遁。友德下令城烏撒。版築方具。實卜引諸蠻復大集。友德據高岡。嚴陣待之。諸將請戰。友德故勿許。士爭奮思

致死。友德度其可用。下令曰：我軍深入，有進無退。彼既遁而復來，心必不一，併力與戰，破之必矣。若使彼據險自固，未易克也。遂進戰，師旣陣，芒部土酋帥衆來援，實卜合勢迎戰。我師趨之，戰數十合，渠長多中槊，墜馬死者。我師益奮，蠻衆大潰，斬首三千級，獲馬六百匹。實卜率餘衆遁，遂城烏撒，得七星關以通畢節。又進至可渡河，於是東川烏蒙芒部諸蠻震懼，皆望風降附。

十五年春正月辛巳朔，元威楚路平章閻乃馬百參政列車不花等詣曹震營降。壬午，元曲靖宣慰司行省樞密院同知怯列該、傅慰高仁、廉訪司副使李羅海千及中慶武定、激江三路嵩盟、晉甯、昆陽、安甯、新興、路南、建水七州、昆明、富民、宜良、南甸、河陽、陽宗六縣、達魯花赤、劄麻等官皆詣藍玉、沐英營降。丁亥，置貴州都指揮使司，命平涼侯費聚、汝南侯梅思祖署司事。甲午，遣使諭傅友德等曰：比得報知雲南已克，然區畫布置尙煩計慮。前已置貴州都指揮使司，然去雲南尙遠，今必置都司於雲南，以統諸軍。旣有土有民，又必置布政使司及府州縣治之。其烏撒、烏蒙、東昌、芒部、建昌之地，更宜約束渠長，畱兵守禦，禁民勿挾兵刃。至如竊翠輩，不盡服之，雖有雲南亦難守也。金朝興兵，略激江、臨安、沅江、尋甸、楚雄、洱海，俱下之。革宣慰司，立臨安府及各府十四衛，置雲南都指揮司，以都督謝熊、馮誠署司事。二月，置雲南布政司，改中慶路爲雲南府，命汝南侯梅思祖、平章潘原明署司事，以張統等爲參政、參議等官。閏二月，竊翠至京，賜衣帽及鈔，遣還藍玉、沐英等進兵攻大理。大理城倚點蒼山，西臨洱海爲固，土目段世聞明師且至，聚衆扼下關以守。下關者，南詔皮羅閣所築龍尾關是也。號爲險要，玉等至，品甸遣定遠侯王弼以兵由洱水東趨上關，爲犄角勢。自率衆抵下關，造攻具，夜半遣都督胡海洋由石門閒道渡河，繞出點蒼

山後攀木援岸而上立旗幟味爽大軍抵下關望之踴躍謹謀敵衆驚亂英身先士卒策馬渡河水沒馬腹將士隨之莫敢後遂斬關而入山上軍望見亦下攻之敵腹背受敵大潰拔其城段世就擒乃分兵取鶴慶略麗江破石門關下金齒於是車里摩些和泥平緬等處相率降雲南悉平三月藍玉遣兵攻拔三營萬戶砦更定雲南所屬府五十二州六十三縣五十四傳友德遣使以故元威順王之子伯伯及梁王家屬三百一十八人送京師并奏云雲南自元世祖至今百有餘年屢經兵燹圖籍不存兵數無從稽考但當以今要害量宜設衛戍守其賦稅則故元司徒平章達里麻等言元末田土多爲豪右隱占今循元舊制歲用不足已督布政司覆諸衛所以給軍食恐有不足宜以今年所徵糧并故官院寺入官田與土官供輸鹽商中納戍兵屯田所入并給之上悉可其奏未幾置雲南鹽課司以益軍費夏四月烏撒東川芒部復畔傳友德移檄沐英合兵進討西堡蠻賊寇普定貴州衛指揮同知顧成擊敗之六月置大渡河守禦千戶所傳友德調從征千戶吳中領兵守之造舟以渡往來上復遣使諭安陸侯吳復平涼侯費聚合征南三將軍攻烏撒烏蒙東川芒部磐石關索嶺諸蠻秋七月沐英自大理還軍滇池會傳友德兵進攻烏撒大敗其衆斬首三萬級獲馬牛羊萬計餘衆遁去復遣兵捕擊悉平之乃以烏撒烏蒙芒部三府地近四川奏隸四川布政司八月乙巳遣使諭傳友德沐英曰得報知永昌侯駐軍建昌大軍七月二十八日已擊破烏撒次第搜捕林箐諸蠻然此地山高道隘慎勿輕動人自七星關來者又曰芒部烏撒蠻至夜舉火挈家入靄翠符至可諭靄翠之民縛送軍前其關索嶺非古道古道又在西北可以大軍蹂之開此道以接普定卽芒部渠長可盡獲將軍其熟圖之已復遣使諭曰雲南士卒旣艱食不

宜分屯止於赤水。畢節七星關各置一衛。黑張之南瓦店之北中置一衛。如此分守則雲南道路往無礙矣。鶴翠之地必用十萬衆乃可定也。凡此者朕所見大概耳。萬里之外豈能周知。將軍便宜自處置。九月傅友德沐英等分兵攻未服諸蠻。以指揮馮誠守雲南。諸蠻見大軍出謂城守虛弱遂相煽叛。土官楊直尤傑點給其下曰。總兵領大軍歸矣。雲南城可圖也。遂糾衆至二十萬會於城下。合三十六營兵攻城。時城中乏食士卒多病。倉猝聞寇至頗以爲憂。誠與指揮謝熊以孤軍嬰城拒守。備樓櫓戰具多置強弓弩於城上。賊至輒射之。多應弦而斃。伺賊少怠出奇兵擊之。賊不能攻。遂圍城爲久困計。時沐英駐師烏撒。聞之選精騎萬餘來援。至曲靖先遣人潛入城報知爲賊所得。給之曰。總兵官領大軍三十萬至矣。賊相顧駭愕。拔營夜遁去。至安甯羅次。邵甸普甯大祺江川等處。據險樹柵欲圖再舉。英至與馮誠等合兵勦捕之。斬首六萬餘級。生擒四千餘人。諸部復定。誠國用子也。

十六年春二月傅友德等遣人送故元雲南右丞觀音保參政車里不花及渠長段世等一百六十人至京。各賜其家衣服。以觀音保爲金齒指揮使。賜姓名李觀。時友德等平蒙化府。鄧川州。破佛光砦。過金沙江。攻北勝府。擒其平章高生。復平麗江府。平津等州。蠻民降者數十萬戶。三月甲辰。上以雲南平。命耿炳文往諭傅友德藍玉等班師。而副將軍沐英以數萬衆留填之。雲南麓川之外有國曰緬。車里之外有國曰八百媳婦。皆請內附。上復置大理指揮使司。命周能爲指揮。統兵守之。五月命六安侯王志安慶侯仇成鳳翔侯張龍督兵往雲南尋甸等處。繕城池立屯堡。安輯其人民。

十七年三月征南將軍傅友德左副將軍藍玉班帥友德平雲南。上前後下璽書數十懸斷萬里外。委曲

皆中友德奉行不敢失。因土俗定租賦。興學校。瘞戰骨。廣屯田。遠邇畏悅。以是遂大定。夏四月壬午。論平雲南功。進封傅友德穎國公。列侯藍玉。仇成。王弼。子孫世及。陳桓。普定侯。胡海。東川侯。郭英。武定侯。張翼。鶴慶侯。將校遞陞有差。秋八月壬申。平緬宜慰使思倫發遣使獻方物。上元所授宜慰司印。平緬在西南彝稍遠。自大理越金齒至其地。有城郭宮室。其人皆樓居。地產象馬。官民皆髡髮如僧。出入則乘象。自前代未嘗通中國。元始遣使招諭。遂入貢。至是大兵下金齒。與平緬壤地相接。思倫發聞之懼。故遣使朝貢。冬十月乙酉。景川侯曹震奏言。四川至建昌驛道所經。大渡河往來之人多死於瘴癘。臣問諸父老。以溫江至建昌各驛馬移置。峨眉新驛爲便。詔從之。

十八年春正月。東蘭州韋富亂。沐英討平之。英在滇。切方物。定貢額。視民數。均力役。雲南民賴以安。分兵剪廣西維摩餘孽。通四川糧道。上喜曰。英能如是。吾無南顧憂矣。冬十二月。思倫發反。率衆寇景東。馮誠擊之。失利。千戶王昇死之。

十九年春二月。雲南臻洞。西浦。擺金。擺榜諸蠻叛。命傅友德率師討之。友德復移兵討平越蠻麻哈楊孟等。平之。秋九月庚申。沐英奏雲南地廣宜置屯田。令軍士開耕。以備儲畜。詔從之。

二十年夏五月庚申。敕諭沐英等勿遣使往平緬。但葺壘金齒。楚雄。品甸及瀾滄江中諸道。固守待之。英自楚雄至景東。每百里置一營。率兵屯種。以備蠻寇。已復命景川侯曹震選四川精兵駐雲南。尋甸。普定。侯陳桓。靖甯侯葉昇。總制雲南諸軍。駐定邊。姚安。畢節。曲靖。越州諸處。立營屯種。候征討。

二十一年春正月。思倫發入寇。結紖於摩沙勒。沐英遣都指揮甯正擊破之。斬首一千五百級。三月。思倫發悉其衆。號三十萬。戰象百餘。復寇定邊。欲報摩沙勒之役。勢甚猖獗。沐英選驍騎三萬。晝夜兼行。凡十五日。抵賊營。隔壘而陣。遣都督馮誠先出輕騎三百挑之。賊以萬人驅象三十餘逆戰。雲南前衛指揮張因率騎卒五十餘人爲前鋒。其渠帥跨巨象直前。我軍注矢連發。矢中象左膝及脅。象仆地。渠長中矢走。追射殺之。諸軍譟而前。殺賊數百人。獲一象而還。英喜曰。賊不足平也。乃下令軍中。置火銃神機箭爲三行。列陣中。俟象進。則前行銃箭俱發。不退。則次行繼之。又不退。則三行繼之。詰旦。分軍爲三隊。命馮誠領其前。甯正領其左。都指揮湯昭領其右。將士皆鼓勇而進。賊悉衆出營。結陣以待。其渠帥把事。招綱等皆乘象。象披甲。背負戰樓。若欄楯。懸竹筒於兩旁。置短槊其中。以備擊刺。陣旣交。羣象突而前。我軍擊之。矢石俱發。聲震山谷。象皆股栗走。指揮張因千戶張榮祖率騎士乘之。直擣其柵。遂縱火焚其寨。烟焰漲天。還復以兵邀擊之。殺傷甚衆。賊黨有昔刺者亦驍勇。復率衆殊死戰。我左師小卻。英登高望之。命左右取帥之首來。左帥遙見一人拔刀飛騎而下。率衆更進。英督戰益急。三軍大呼而慶。不移時。賊衆大敗。斬首三千級。俘萬餘人。生獲象三十有七。餘皆被矢如蝟死。渠帥刁斯郎理各中百餘矢。斃象背上。餘賊潰。英帥師追襲之。賊連日不得食。死者相枕藉。思倫發遁去。夏六月。東川蠻叛。命傅友德爲征南將軍。沐英陳桓爲左右副將軍。曹震葉昇爲左右參將。率馬步諸軍討之。八月壬寅。沐英遣都督甯正從傅友德討東川。九月。越州土目阿資叛。阿資故囉囉種苦麻部。王師南征。沐英駐兵其地之湯池山。諭降之。至是。叛傅友德等將兵討之。道過平彝。以其山勢峭險。密邇阿資。遂遷其山民往居早上村。畱神策衛千戶劉

成等駐兵立柵其上。後以爲平彝千戶所。阿資等復帥衆寇普安。燒府治。大掠。友德進擊之。斬其渠滿已青。

二十二年春正月。阿資退屯普安。倚崖壁爲砦。傅友德以精兵蹙之。蠻衆皆緣壁攀崖。墜死者不可勝數。生擒一千三百餘人。阿資遁還越州。沐英遣甯正從友德擊阿資於越州。大敗之。斬其黨火頭弄宗等五十餘人。初。阿資之遁也。揚言曰。國家有萬軍之勇。而我地有萬山之險。豈能盡滅我輩。英乃請置越州馬隆二衛。扼其衝要。分兵追捕之。阿資窮蹙降。甲午。曹震。葉昇領兵分討東川叛蠻。悉平之。冬十一月。思倫發遣把事招綱等來言。叛逆之謀皆其下刁斯郎等爲之。以象馬白金入貢。願輸貢賦。百彝遂平。

二十四年冬十二月。沐英以阿資畔服不常。請徙越州衛於陸涼鎮之。阿資復畔。平羌將軍何福督兵討之。至越州。阿資援絕降。福扼險置甯越堡。

二十五年夏六月丁卯。西平侯沐英卒於雲南。雲南二十郡。左右分畫。界以大江。東北曰金沙。西南曰蘭滄。俱入海。幅員萬里。英鎮雲南。簡官僚。修惠政。剔姦蠹。興學校。治水利。墾田一百一萬二千畝。軍食贏足。恩威並著。教化大行。雲南遂爲樂土。嘗入朝。賜宴奉天殿。賞黃金綵幣。陛辭。上撫之曰。使我高枕無南顧憂者爾也。既卒。追封黔甯昭靖王。命其子春襲封西平侯。填雲南。

二十八年春正月。阿資復叛。西平侯沐春。平羌將軍何福擒斬之於越州。

三十年春正月。置雲南按察司。秋九月。平緬諸蠻刁幹孟叛。遂宜慰使思倫發奔訴京師。命西平侯沐春爲征南大將軍。都督何福。徐凱爲左右副將軍。率雲南四川兵討之。冬十二月乙巳。遣思倫發還雲

南駐怒江上。命沐春令刁幹孟歸而主毋爲不臣。

三十一年春二月刁幹孟請入貢。夏五月西平侯沐春進兵擊平緬。先以兵送思倫發於金齒使人諭刁幹孟不從。乃遣左軍都督何福瞿能等將兵五千往討之。福等躋高良公山直擣南甸大破之。殺其渠刁名孟斬獲甚衆。還兵擊景罕寨。寨乘高據險堅守不下。官軍糧械俱盡。賊勢益盛。福使告急於春。春率五百騎往救之。乘夜至怒江。詰旦徑渡。令騎馳躡寨下。揚塵以警之。賊乘高望見塵起蔽天。不意大軍卒至。驚懼遂率衆降。春乘勝復擊崆峒寨。賊夜潰走。刁幹孟乃遣人乞降。帝以其反覆不之許。尋春病卒。何福討擒刁幹孟。思倫發始得還。平緬悉定。

谷應泰曰。梁王以故元宗室裂土滇南。國亡君死。偷視蠻陬。此其勢非同天水之坐大隴西。子陽之稱尊白帝也。大義自裁誓不反顧。則北地劉謚猶能殉漢。烏孫公主義不忘隋。瘞王禕於北寺。斬吳雲於沙塘。死從余闕。生媿危公。計非得已。節斯烈矣。若以大命旣去。新主有歸。天子北門已棄。中原於敝屣。孤臣天末難填滄海於丸泥。則子嬰軼道。詎是亡秦。劉禪長安無須思蜀。稱臣歸命。納土入朝。頡利冢留灞上。突利老死并州。我其臣僕之悲亦明哲保身之智也。而乃猶豫兩端徘徊去就。旌旗舳艫蔽江西上。乃始開闢平章。斂兵曲靖。不知烏撒之師分出永甯。普定之兵專攻曲靖。大軍直擣雲南。偏師還赴大理。堂陞有聚米之形。將帥成破竹之勢。釜中游魂久已在太祖握中矣。倉皇聞敗。六宮出走。龍衣焚於寶殿。閩門驅死滇池。鼠輩乃爾。何因倔強如是耶。或亦魯連帝秦。願蹈東海。田橫入朝。道列客舍之志與。而太祖之下雲南也。運籌萬里。料敵如神。山川險阨。俱似躬行。進退指揮不爽尺寸。史稱漢祖止於百敗不折。敵畏唐

宗不過身先諸將。方其雄略。瞠乎後矣。若夫曲靖之戰。沐英決策。冒霧疾驅。兵臨白石。甯我薄人。毋人薄我。此先軫所以克也。張幟展角。潛出敵背。此陳餘所以擒也。臨江結陳。退不能止。此苻融所以死也。甲高熊耳之山。馬飲昆明之水。路踰萬里。時纔百日。耿弇功震祝阿。李靖風行突厥。潯陽何多讓焉。雖其後竊發時聞。不煩左顧。而軍若驚颺。彼同敗葉。遙傳仁貴。咋舌稱神。爭識令公。望塵羅拜。沐氏父子所以威行萬里也。夫武帝用事西南彝。夜郎。邛笮。遂成荒服。唐復陷入吐蕃。宋乃割於西夏。元極兵威。始分桐葉。而黔甯永鎮。三百年來。不獨貝金象齒。來自殊方。抑且金馬碧鷄。入參侍從。豈非春風所及。鷹眼能絃。泮水之林。鶡音速化。猗與盛哉。

卷十三

胡藍之獄

太祖洪武二年冬十月。上欲以楊憲爲丞相。問劉基。基素與憲厚。以爲不可。上怪之。基曰。憲有相才。無相器。夫宰相者。持心如水。以義理爲權衡。而已不與焉者也。今憲不然。能無敗乎。上曰。汪廣洋何如。基曰。此褊淺。上曰。胡惟庸何如。基曰。小犢耳。將債轅而破犁。上曰。吾之相無踰於先生。基曰。臣非不自知。臣疾惡太深。又不耐繁劇。爲之。且負大恩。天下何患無才。願明主悉心求之。如目前諸人。臣誠未見其可也。六年秋七月。以胡惟庸爲中書左丞相。

八年夏四月。誠意伯劉基卒。初。上旣相胡惟庸。基大感曰。使吾言不驗。蒼生之福也。言而驗者。其如蒼生

何因憂憤增疾。基嘗爲上陳甌閩事。蓋甌閩之間有隙地曰淡洋。其南抵閩界曰三魁。爲巖盜藪。方氏所由亂。基奏於其地立巡檢司以控扼之。其姦民弗便也。相率挾逃戍之卒以叛。而大豪復陰持其竄。基使子璉上書奏之。而不先白中書省。惟庸故銜基。使刑部尙書吳雲劾之。以淡洋踞山海。有王氣。欲圖爲墓地。民勿與。則建立司之策以窘其人。至激變。疏入。上下有司。惟庸請加以重辟。又欲逮基子璉獄。上皆不問。而第令移文使基知。基乃馳入朝見上。不敢辨。惟引咎自責而已。亦不敢言歸。俄有疾。惟庸覘上念基怠。乃陽爲好者。以正月朔挾醫來視疾。基飲之。覺有物積胸中如拳石。閒以白上。上不省也。又三月寢劇。使使問之。知不能起。驛舟護歸青田。亡何竟卒。

十三年春正月。左丞相胡惟庸謀不軌。伏誅。自楊憲。汪廣洋。旣敗。惟庸總中書政。專生殺黜陟。以恣威福。內外諸司封事入奏。惟庸先取視之。有病己者。輒匿不聞。由是奔競之徒趨其門下。魏國公徐達深嫉其奸邪。常從容言於上。惟庸銜之。達有闈者。福壽惟庸陰誘致爲己用。爲福壽所發。惟庸故起家甯國令。時太師李善長秉政。惟庸餽遺善長黃金二百兩。遂得召入。爲太常卿。累遷中書參政。遂與善長深相結。以兄女妻善長從子祐。貪賄弄權。益無所忌。一日。其定遠舊宅井中忽出竹筍。出水高數尺。諛者爭言爲丞相瑞應。又言其祖父三世家上。夜有光燭天。於是惟庸稍自負。有邪謀矣。會惟庸家人爲奸利事。道關榜辱關吏。吏奏之。帝怒。殺家人。惟庸謝不知。帝又究故。誠意伯死狀。惟庸懼。且見發。乃計曰。主上草菅勳舊臣。何有我死等耳。甯先發。毋爲人束手寂寂。而是時吉安侯陸仲亨。平涼侯費聚者。常犯法。帝切責之。二人懼。惟庸陰以權利脅誘之。二人素慧勇。又見惟庸用事。因與往來久之。益密。惟庸與御史大夫陳甯坐

省中閱天下軍馬籍。令都督毛驥取衛士劉遇寶及亡命魏文進等爲心膂。曰：吾有用爾也。太僕寺丞李存義、善長之弟、惟庸之壻父也。以親故往來惟庸家。惟庸令存義陰說善長以邪謀。惟庸又使指揮林賢下海招倭軍。約期來會。又遣元臣封績致書稱臣於元。請兵爲外應。皆未發。會惟庸子乘馬奔入輓輅中。馬死。惟庸殺輓輅者。上怒。命償其死。惟庸逆謀益急。而是時日本貢使適私見惟庸。惟庸約其王。令以舟載精兵千人。僞爲貢者。及期。會府中力士掩執帝。度可取。取之不可。則掠庫物泛海。就日本有成約。正月戊戌。惟庸因詭言第中井出醴泉。邀帝臨幸。帝許之。駕出西華門。內使雲奇衝蹕道。勒馬銜言狀。氣方勃。舌駭不能達意。太祖怒其不敬。左右搗捶亂下。雲奇右臂將折。垂斃。猶指賊臣第弗爲痛縮。上悟。乃登城望其第。藏兵複壁間。刀槩林立。卽發羽林掩捕。考掠具狀。磔於市。并其黨御史大夫陳甯中丞涂節等皆伏誅。僚屬黨與凡萬五千人。株連甚衆。羣臣請誅李善長。陸仲亨等。上曰：朕初起兵時。李善長來謁軍門。曰：有天有日矣。是時朕年二十七。善長年四十一。所言多合吾意。遂命掌書記贊計畫。功成。爵以壯公。以女與其子。陸仲亨年十七。父母兄弟俱亡。恐爲亂兵所掠。持一升麥藏於艸間。朕見之。呼曰：來。遂從朕。旣長。以功封侯。此皆吾初起時股肱心膂。吾不忍罪之。其勿問。癸卯。詔罷中書省。陞六部官秩。倣古六卿之制。改大都督府爲中左右前後五軍都督府。祖訓云：自古三公論道。六卿分職。不聞設立丞相。自秦始制丞相。不旋踵而亡。漢唐宋雖有賢相。然其中多小人。專權亂政。今罷丞相。設五府六部。都察院。通政司。大理寺等衙門。分理天下庶務。事皆朝廷總之。十二月。致仕學士承旨宋濂以孫慎坐胡惟庸黨被刑。籍其家。械濂至京。上怒。欲誅之。皇后諫曰：民間延一師。尙始終不忘恭敬。宋先生親教太子。諸王。豈忍殺之。

且宋先生家居甯知朝廷事耶。上意解濂得發茂州安置。行至夔州以疾卒。

十四年春二月有訴浦江鄭氏交通胡惟庸者。時四方仇怨相告訐。凡指爲胡黨。率相收坐重獄。鄭氏素以孝義聞。兄弟六人。吏捕之急。諸兄爭欲行。其弟鄭湜曰。弟在。乃使諸兄羅刑辟耶。獨詣吏請行。仲兄濂先有事京師。暨弟至。迎謂曰。吾家長當任罪。弟無與焉。湜曰。兄老。吾往辨之。萬一不直。弟當伏辜。二人爭入獄。上聞俱召至廷。勞勉之。謂近臣曰。有人如此。而肯從人爲非耶。卽宥之。擢湜爲福建布政司參議。二十三年夏五月乙卯。太師李善長自縊。虞部郎中王國用上書訟冤。略曰。人情之愛其子。必甚於愛其兄弟之子。善長於胡惟庸。姪之親耳。於陛下則子之親也。使善長佐惟庸成事。亦不過勳臣第一而已矣。太師國公。男尙主。女納妃而已矣。且善長豈不知天命之不可倖求。當元之季。欲爲此者何限。莫不世絕宮污。不保首領。此善長之所熟見也。人年邁。精神意慮。鼓舞舞倦矣。儉安苟容。則善長有之。曾謂有血氣之強暴。感動其中也哉。且善長子事陛下。託骨肉。無纖芥之嫌。凡爲此者。必有深仇急變。大不得已。而後父子之間。或至相挾以求脫禍。未有平居晏然。都無形迹。而忽起此謀者。此理之所必無也。若謂天象告變。大臣當災。則殺人以應天象。夫豈上天之意哉。今不幸已失刑。而臣懇惻爲陛下明之。猶願陛下作戒於將來也。天下孰不曰。功如李善長。又何如者。臣恐四方之解體也。不報國用。疏解縉代艸也。命刑部以肅清逆黨事。播告天下。韓國公李善長。列侯胡美。唐勝宗。陸仲亨。費聚。已故侯顯時。陳德。華雲龍。王志。楊環。朱亮祖。梅思祖。陸聚。金朝興。黃彬。薛顯。都督毛驥。陳萬亮。耿忠。於琥。凡二十人。二十五年秋八月丙子。靖甯侯葉昇。坐交通胡惟庸伏誅。

太祖洪武十八年秋八月命西平侯沐英爲征西將軍率都督藍玉等統兵征西番玉開平王常遇春婦弟也長身頰面有勇略從遇春麾下每戰先登陷陣所當無前遇春素稱於上上亦以遇春故寵異之累功至都督僉事至是同英討西番擒其渠瘦脖子斬獲以千計獲馬二萬餘匹牛羊十餘萬還封永昌侯十四年秋九月命永昌侯藍玉以征南副將軍同穎川侯傅友德討雲南轉戰平之事見太祖平滇

二十年春正月命永昌侯藍玉爲右副將軍同宋國公馮勝襲金山納哈出降之併降其衆十餘萬勝以誑誤召還卽軍中拜玉爲大將軍事見故元遺兵

二十一年夏四月大將軍藍玉襲捕魚兒海獲元主次子地保奴后妃公主百三十餘人吳王朶兒只等將相官校三十人男女七萬馬駝五萬上大悅下璽書褒玉比之衛青李靖秋七月戊寅大將軍藍玉遣人送元主次子地保奴及后妃公主等至京旣而有言玉私元主妃事上大怒曰玉無禮如此豈大將軍所爲哉元主妃聞之惶懼自盡玉還朝上切責之戒以率德改行十二月壬戌封永昌侯藍玉爲涼國公先是擬封玉梁國公至是改封涼鐫其過於券

二十三年春正月西番蠻人復叛命涼國公藍玉率都指揮瞿能往大渡河邀擊之玉討平岳川雜道克散毛峒擒土目刺惹等萬餘人置大水田千戶所進平施南忠建二宣撫司叛蠻還增歲祿賜黃金文綺尋詔還鄉

二十四年冬十月命涼國公藍玉往陝西訓練軍士

二十五年夏四月涼國公藍玉捕逃寇祁者孫遂略西番罕東之地玉兵入罕東遣都督宋晟徇阿真州

番衆皆遠遁。而會蜀故降將月魯帖木兒。反建昌。使玉移師討之。至前裨將瞿能。已大破其衆。月魯帖木兒走柏興。玉以計誘縛其父子。送京師。斬之。盡降其餘黨。便宜請增設諸衛。且請籍民爲兵。上報設諸衛。而不許籍民。遂班師。

二十六年春正月乙酉。涼國公藍玉謀不軌。伏誅。初。胡惟庸之畔。有稱玉與其謀者。上以其功大。宥不問。後諸老將多沒。乃擢爲大將。總兵征伐。甚稱上意。嘗措置陝西邊事。至蘭川。墜馬。微傷手。詔慰勞之。比於中山。開平二王。然玉素不學。性復狠愎。見上待之厚。又自恃功伐。專恣橫暴。畜莊奴。假子數千人。出入乘勢。漁獵。嘗占東昌民田。民訟之。御史按問。玉執御史捶而逐之。先是北征還。私其珍寶。駝馬無算。渡喜峯關。吏以夜不卽納。玉大怒。縱兵毀關而入。上聞之不樂。併詰責其私元主妃。玉慢不省。嘗見上命坐。或侍宴飲。玉動止傲慢。無人臣禮。及總兵在外。擅陞降將校。黥刺軍士。甚至違詔出師。恣作威福。以脅制其下。至是。征西還。意圖陞爵。及命爲太傅。玉攘袂大言曰。我固不當爲太師也。恆怏怏不樂。居宋。穎二公下。聞奏事。上不從。玉懼。退語所親曰。上疑我矣。乃謀反。當是時。鶴慶侯張翼。普定侯陳桓。景川侯曹震。舳艫侯朱壽。東莞伯何榮。都督黃恪。吏部尙書詹徽。侍郎傅友文。及諸武臣。嘗爲玉部將者。玉乃遣親信召之。晨夜會私宅。謀議集士卒及諸家奴。伏甲將爲變。約束已定。爲錦衣衛指揮蔣瓛所告。命羣臣訊狀。具實。磔於市。夷三族。徹侯功臣文武大吏。以至偏裨。將卒坐黨論死者。可二萬人。蔓衍過於胡惟庸。三月辛酉。會甯侯張溫。都督蕭用。瀋陽侯察罕。坐藍玉黨伏誅。九月。詔胡黨藍黨除。已捕在官者外。其未發不究。谷應泰曰。昔者太公賜履。南至穆陵。鸞熊論封。奄有江漢。以故土田圭瓚。勒之景鐘。而彤弓盧矢。銘之太

常用以分王功臣。永保厥世。甚盛典也。乃高帝刑馬。綰豨。伏鎖。闔閭誓國。伍胥屬鏹。遣介推於縣上。試文。糴於地下。弓藏鳥盡。良足悲矣。明太祖力戰中原。躬擐甲冑。櫛風沐雨。賴茅土之爪牙。枕戈臥鼓。藉置林。之虓虎。洪武三年。大告武成。論功行賞。公爵者十人。侯爵者二十八人。鐵券丹書。誓諸白水。河帶山礪。爰及苗裔。主非無勞之賜。臣亦非無功之奉也。獨柰何。惟庸。復壁藏兵。藍玉家奴。衷甲張敖。不軌逼漢祖於柏人。宣武稱兵。追黃鬚於姑孰。遂乃爵除五等。禍及三宗。然而推其始。初胡以傾邪。升鼎耳。蓋以寵利居成功。不學無術。器小任重。宜其及也。乃論者以光武保全功臣。所封不過大縣數四。所加不過特進朝請。故君臣之恩。始終不替。鹿鳴天保。若魚水焉。然予考太祖之分封也。至尊貴者。無過韓國。食祿四千石。魏國。食祿五千石。未嘗裂土自王也。至任用者。出師則本於廟算。還軍則歸之禁旅。亦未嘗得專征伐也。凡此內安外攘。勢若犬牙。強幹弱枝。何難控禦。而乃以一人跋扈。遂疑尾大之圖。倉卒啓機。傳會難明之事。株連者四萬。失侯者二十周。內深文。亦云慘矣。夫淮陰。陽夏。就令關通。彭越。樂布。罪無相及。而況阜隸之後。漸乃式微。耐金之舉。以次削除。甯有朝登盟府。夕繫檻車。口血未乾。爰書遂擬。以致善長自縊。景濂道亡。蕭何三木而就徵。望之仰藥而自殺。豈尙功之典。不設於齊侯。而議功之條。不載於周禮耶。雖然。高帝晚年。甘露慶雲。履書於冊。而醴泉之詐興。貶爵削封。播告於外。而伏甲之謀起。是則胡藍之覆。抑亦鳳德之衰也。至若徐中山之忠志無疵。李岐陽之好學飭行。湯信公之聽命唯謹。沐西平之居貴不驕。竝皆攀龍鱗而有功。履虎尾而不咥。嗚呼。與畢散之徒爭烈矣。

開國規模

元順帝至正二十四年春正月。李善長、徐達等率羣臣奉太祖卽吳王位。以李善長爲中書右相國。徐達爲中書左相國。太祖退朝。語善長等曰。建國之初。先正綱紀。綱紀先禮。元氏主荒。臣專。今宜鑒之。三月。置起居給事中。日侍左右。記言動。諭中書省臣。許山林士伍。上書效用。民間俊秀。年二十五以上。有學識者。辟赴中書。夏四月甲午。太祖退朝。語侍臣孔克仁曰。秦主虐臣。佞天下叛之。漢高起布衣。寬大善駕馭。遂帝天下。今元政弛極。豪傑蜂起。皆不修法度。以明軍政。因感歎久之。五月。太祖御白虎殿。閱漢書。問宋濂、孔克仁。漢治何不三代也。克仁曰。王霸之道雜。太祖曰。咎將誰始。曰。在高祖。太祖曰。然高祖創業。未遑禮樂。孝文時當制作。復三代之舊。乃逡巡未遑。使漢家終於如是。三代有其時而能爲之。漢文有其時而不爲耳。周世宗則無其時而爲之者也。

二十六年夏六月。命有司訪求古今書籍。藏之秘府。以資覽閱。因謂侍臣詹同等曰。三王五帝之書。不盡傳於世。故後世鮮知其行事。漢武帝購求遺書。六經始出。唐虞三代之治。可得而見。武帝雄才大略。後世罕及。至表章六經。闡明聖賢之學。尤有功於後世。吾每於宮中無事。輒取孔子之言觀之。如節用而愛人。使民以時。真治國良規。孔子之言。誠萬世師也。十二月。太祖以國之所重。莫先宗廟郊社。遂定議。以明年爲吳元年。命有司建圓丘於鍾山之陽。以冬至祀昊天上帝。建方丘於鍾山之陰。以夏至祀皇土地祇。及建廟社立宮室。己巳。典營繕者以宮室圖進。太祖見雕琢奇麗者。命去之。謂中書省臣曰。千古之上。茅

茨而聖。雕峻而亡。吾節儉是寶。民力其毋殫乎。禁箋文頌美。諭中書省臣曰。古人祝頌其君。皆寓警戒。適觀羣下所進箋文。多譽少規。殊非君臣相成之道。其一切禁止。

太祖吳元年春正月戊戌。諭中書省臣曰。吾昔在軍中。嘗空腹出戰。得粗糲甚甘。今未嘗忘之。太平應天。宣城諸郡。吾渡江開創地。供億尤勞。其免太平租稅六年。應天宣城諸郡一年。三月。定文武科取士之法。先是。令有司每歲舉賢才及武勇謀略通曉天文之士。其有兼通書律吏亦得薦舉。得賢者賞濫舉及蔽賢者罰。至是。乃下令設文武二科。其應文學者。察之言行。以觀其德。考之經術。以觀其業。試之書算。以觀其能。策之經史時務。以觀其政事。應武舉者。先之以謀略。次之以武藝。俱求實效。不尙虛文。三年。一開舉。夏五月。下令曰。予本布衣。因亂撫定江左。十有三年。中原之民流離顛頓。尙無所歸。吾乃積粟控弦。其徐宿濠泗壽邳襄陽安陸免徭賦三年。六月。諭憲臣曰。任官不當。則庶事不理。用刑不當。則無辜受害。故刑不可不慎也。夫置人於捶楚之下。何求不得。古人用刑。本求生人。非求殺人。故欽恤爲用刑之本。又諭中書省臣曰。法有連坐之條。吾以爲鞠獄當平恕。非大逆不道。則罪止其身。先王罪不及孥。罰勿及嗣。忠厚之至也。自今民有犯者。毋連坐。參政楊憲對曰。先王用刑。時輕時重。自元政姑息。民輕犯法。非重治之。則犯者益衆。太祖曰。民之爲惡。如衣之積垢。加以澣濯。則可以復潔。汙染之民。以善導之。則可以復新。夫威以刑戮。而使不敢犯。其術淺矣。且求生於重典。是猶索魚於釜。故凡從輕典。雖不求其生。無死之道。秋七月乙亥。太祖御戟門閱雅樂。自擊石磬。學士朱升辨五音。誤宮爲徵。起居注熊鼎曰。八音石磬最難和。故書曰。於予擊石百獸率舞。太祖曰。樂以人聲爲主人。聲和卽八音諧矣。鼎曰。樂不外求在於君。

心君心和則天地之氣亦和。天地之氣和則樂無不和。太祖深然之。除郡縣官定賜予道里之費以養廉也。九月甲戌朔太廟成。癸卯新內三殿成。曰奉天。華蓋。謹身。左右樓曰文樓。武樓。殿之後爲宮。前曰乾清。後曰坤甯。六宮以次序列。皆朴素不爲飾。命博士熊鼎類編古人行事可爲鑒戒者書於壁間。又命侍臣書大學衍義於兩廡壁間。太祖曰。前代宮室多施繪畫。予用此備朝夕觀覽。豈不愈於丹青乎。是日有言瑞州出文石可竝地。太祖曰。敦崇儉朴。猶恐習於奢華。爾不能以節儉之道事予。乃導予侈麗。言者慚而退。冬十月丙午命百官禮儀俱上左。先是承元制尙右。至是改之。以右相國李善長爲左相國。敕禮官建元右丞余闕。江州總管李黼。御史大夫福壽祠歲時祀之。甲寅命中書省定律令。太祖以唐宋皆有成律。斷獄惟元不做古制。取一時所行之事爲條格。胥吏易上下滋弊。至是臺察已立。按察司將巡歷郡縣。乃命李善長。楊憲。傅瓛。劉基。陶安等詳定。諭之曰。立法貴在簡當。使人易曉。若條緒繁多。或一事而兩端。可輕可重。使貪吏得藉手爲奸。則所以禁殘暴者。適以賊良善。非良法也。夫網密則水無大魚。法密則國無全民。卿等宜盡心參究。凡刑名條目。吾與卿面議斟酌之。庶可爲久遠之法。已而律令成。太祖親閱視。去煩減重。命頒行之。十一月甲午。圜丘成。太祖出視。世子從行。太祖因命左右導之。徧歷農家。觀其居處飲食器用。還謂之曰。汝知農之勞乎。夫農身不離畎。手不釋耒耜。終歲勤動。不得休息。其所居不過茅茨草戶。所服不過練裳布衣。所飲食不過菜羹糲飯。而國家經費皆其所出。故令汝知之。凡居處食用。必念農之勞。取之有制。用之有節。使之不苦於饑寒。若復加之橫斂。則民不堪命矣。十二月丁未。以先聖孔子五十六世孫希學襲封衍聖公。癸丑。中書省左相國李善長。率文武羣臣勸進。太

祖辭固請不許。明日復請許之。辛酉，善長率羣臣以卽位禮儀進。甲子，太祖御新宮，以羣臣推戴之意祭告上帝神祇。

太祖洪武元年春正月壬申朔，四日乙亥，上祀天地於南郊，卽皇帝位。定有天下之號曰大明，建元洪武。遂詣太廟，追尊四代祖考。丁丑，大宴羣臣於奉天殿。上曰：吾觀史傳所載歷代君臣，或君上樂聞忠讜，而臣下循默不言，或臣下抗言直諫，而君上飾非拒諫。比來朕每發言，百官唯訥而已。其閒豈無是非得失，可以直言者？自今宜盡忠讜，以匡朕不逮。辛丑，命廷臣兼東宮官。先是中書及都督府議做元舊制，設中書令，欲奏以太子爲之上。上曰：元人事不師古，設官不以任賢，惟類是與，豈可取法？且吾子年齒未長，更事未多，所宜尊禮師傅，博通今古。他日軍國重務，皆令啓聞，何必倣彼作中書令乎？禮部尙書陶凱請選人專任東宮官屬。上曰：朕以廷臣有德望者兼東宮官，非無謂也。嘗慮廷臣與東宮屬有不能，遂成嫌隙。江充之事，可爲明鑒。朕今立法，令臺省等官兼東宮官贊輔之。父子一體，君臣一心。於是以李善長爲太子少師，兼詹事，馮勝兼副詹事，楊憲傳璫兼府丞，徐達兼太子少傅。常遇春兼太子少保，鄧愈、湯和兼太子諭德，章溢兼太子贊善，大夫劉基兼太子率更令。上諭善長等曰：朕於東宮不別設府僚，而以卿等兼之者，蓋軍旅未息，朕若有事於外，必畱太子監國。若設府僚，卿等在內事當啓聞，太子或聽斷不明，卿等必謂府僚導之，嫌疑由是而生。朕所以特置賓客諭德等官以輔成太子德性，且選名儒爲之賓友。昔周公教成王，告以克詰戎兵，召公教康王，告以張皇六師。此居安慮危，不忘武備，蓋繼世之君生長富貴，狃於安逸，軍旅之事多忽而不務，一有緩急，罔知所措。二公之言不可忘也。上欲官外戚，后曰：國家

官爵當用賢能。妾家親屬未必有可用之才。且聞前世外戚家多驕淫。不守法度。每致覆敗。陛下加恩妾族。厚其賜予。使得保守足矣。若非才而官之。恃寵致敗。非妾所願也。上遂止。上朝罷。從容謂劉基。章溢曰。朕起淮右。以有天下。戰陣之際。橫羅鋒鏑者多。常惻然於懷。夫喪亂之民。思治安。猶饑渴之望飲食。若更毆以法令。譬以藥療疾而加之以鴆。民何賴焉。溢頓首曰。陛下深知民隱。天下蒼生之福也。上與儒臣論學術。陶安對曰。正道之不明。邪說害之也。上曰。邪說之害道。猶美味之悅口。美色之眩目。戰國之時。縱橫捭闔之徒。肆其邪說。諸侯急於利者多。從之。往往事未就而國隨以亡。此誠何益。夫邪說不去。則正道不興。天下焉得而治安。對曰。陛下所言深探其本。上曰。仁義治天下之本也。賈生論秦之亡。不行仁義之道。夫秦襲戰國之弊。又安得知此。天下府州縣官來朝。陛辭。上諭之曰。天下初定。百姓財力俱困。譬猶初飛之鳥。不可拔其羽。新植之木。不可搖其根。要在安養生息之而已。惟廉者能約己而利人。貪者必賤人而厚己。有才敏者或溺於私。善柔者或昧於欲。此皆不廉致之也。爾等當深戒之。甲申。詔遣周鑄等一百六十四人往浙西覈實田畝。諭中書省臣曰。兵革之餘。郡縣版籍多亡。今欲經理以清其源。無使過制。以病吾民。夫善政在於養民。養民在於寬賦。其遣周鑄等往諸府縣覈實田畝。以定賦稅。此外無令有所妄擾。上謂劉基曰。曩者羣雄角逐。生民塗炭。今天下次第已平。思所以生息之道。何如。基對曰。生民之道在於寬仁。上曰。不施實惠而槩言寬仁。亦無益耳。以朕觀之。寬民必當阜民之財。息民之力。不節用。則民財竭。不省役。則民力困。不明教化。則民不知禮義。不禁貪暴。則無以遂其生。基頓首曰。此所謂以仁心行仁政也。二月。敕中書省臣定郊社宗廟禮以聞。於是李善長、傅瓛、陶安等引古酌今。擬冬至祀。

昊天上帝於圓丘。以大明夜明星太歲從。夏至祀方丘。以五嶽五鎮四海四瀆從。四代各一廟。廟皆南向。以四時孟月祭。及歲除。則合祭於高廟。社稷以春秋二仲月上戊日從之。定衛所官軍及將帥將兵之法。自京師及郡縣皆立衛所。大率以五千六百人爲一衛。一千一百二十人爲一所。一百一十二人爲百戶。所每百戶所設總旗二名。小旗十名。官領鈐束通。以指揮使等官領之。大小相連以成隊伍。有事征伐。則詔總兵官佩將印領之。旣旋。則上所佩將印於朝。官軍各回本衛。大將軍身還第。權皆出於朝廷。不敢有專擅。自是征伐率以爲常。丁未。詔以太牢祀孔子於國學。仍遣使詣曲阜致祭。詔衣冠悉如唐制。乙丑。命中書議役法。上以立國之初。經營興作。恐役及貧民。乃命中書省驗田出夫。於是省臣奏議。田一頃出丁夫一人。不及頃者以別田足之。名曰均工夫。遇有興作。農隙用之。庚午。命選國子監生侍太子讀書。三月丁未。命翰林儒臣修女誡。上謂學士朱升等曰。治天下者。修身爲本。正家爲先。正家之道。始於夫婦。后妃雖母儀天下。然不可以預政事。至於嬪嬙。不過備職事。侍巾櫛。若寵之太過。則上下失序。觀歷代宮闈。政由內出。鮮有不爲禍亂者也。內嬖惑人。甚於鴆毒。惟賢明之主。能察之於未然。其他未有不爲所惑者。卿等纂修女誡。及賢妃之事。可爲法者。使後世子孫知所持守。甲申。徐達奏上所獲山東土地甲兵數。時近臣因進言。山東有銀場。可興舉者。上曰。銀場之弊。利於官者少。損於民者多。今凋瘵之餘。豈可以此重勞民力。昔人有拔茶種桑。民獲其利者。汝豈不知耶。言者慚而退。乙酉。蘄州進竹篋。命卻之。諭中書省臣曰。古者方物之貢。惟服食器用。無玩好之飾。今蘄州進竹篋。未有命而來獻。天下聞風。爭進奇巧。則勞民傷財。自此始矣。其勿受。仍令四方非朝廷所需。毋得妄獻。夏四月丁未。命圖古孝行。

及身所經歷艱難起家戰伐之事以示子孫。上謂侍臣曰：朕本農家，祖父皆長者，積善餘慶，以及於朕。今圖此者，後世子孫富貴易驕，使觀之，知王業艱難也。丙辰，禁宦官預政典兵。上謂侍臣曰：吾見史傳所書漢唐末世，皆爲宦官敗盡，未嘗不爲之惋歎。易稱開國承家，小人勿用，其在宮禁，止可使之供灑掃，給使令而已。豈宜預政典兵。漢唐之禍，雖宦官之罪，亦人主寵愛之使然。向使宦官不得典兵預政，雖欲爲亂，其可得乎。秋七月，帶刀舍人周宗上疏請府州縣開設學校。上嘉納之。庚寅，賑卹中原貧民。中書省臣慮財匱，上曰：周窮乏者不患無餘財，患無其心。果心注之，何憂不贍。閏七月丁未，徵天下賢才。至京，授以守令。上語中書省臣曰：布衣之士，新授以政，必先養其廉恥，然後責其成功。洪範曰：既富方穀。此古人之良法美意也。乃厚賜而遣之。免吳江、廣德、太平、甯國、和澠水旱災租。八月，漳州府通判王禕上言：人君修德之要有二，忠厚以爲心，寬大以爲政。昔者周家忠厚，故垂八百年之基；漢室寬大，故開四百年之業。蓋上天生物爲心，春夏長養，秋冬收藏，其閒雷電霜雪，有時而搏擊肅殺焉，然皆暫而不常。向使雷電霜雪無時不有，上天生物之心息矣。臣願陛下之法天道也。浙西旣平，租賦旣廣，科斂之當減，猶可議者，臣願陛下之順人心也。上嘉納之。時反元政，尙嚴厲，故禕以爲言。上謂宋濂等曰：秦始皇、漢武帝好尙神仙，以求長生，卒無所得，使移此以圖治天下，安有不理。以朕觀之，人君能清心寡欲，使民安田里，足衣食，熙熙皞皞，而不自知，卽神仙也。始置六部官，先是中書省惟設四部，掌錢穀禮儀刑名營造。至是乃定置吏戶禮兵刑工六部分理庶務。御史中丞劉基致仕，先是上北巡，命基同李善長留守京師。基言於上曰：宋元以來寬縱日久，當使紀綱振肅，而後惠政可施也。上然之。基素剛嚴，凡僚吏有犯，卽

捕治之。宦者監工匠不肅啓皇太子。捕置法。宿衛舍人弈碁於直舍。按治之人皆側足立。中書都事李彬。飢法事覺。彬素附善長。善長託基緩其獄。基不允。遣人馳奏請誅彬。上可其奏。時大旱。善長等方議禱雨。而誅彬之報適至。善長曰。今欲禱雨。可殺人乎。基怒曰。殺李彬。天必雨。遂斬彬。善長銜之上。還怨基者多。訴於上前。善長亦言基專恣。語頗切。會基有喪。告歸許之。上幸北京。放元宮人。命學士詹同等十人分行十道。旁求隱逸之士。有司奏造乘輿服御諸物。應用金者。特命以銅爲之。有司言費小不足。惜上曰。朕富有四海。豈吝於此。然所謂儉約者。非身先之。何以率下。且奢侈之原。未有不由小至大者也。冬十月甲午。司天監進元所置水晶刻漏。備極機巧。中設二木偶人。能按時自擊鉦鼓。上覽之。謂侍臣曰。廢萬幾之務。用心於此。所謂作無益害有益也。命左右碎之。十一月辛丑。建大本堂。命取古今圖籍充其中。延儒臣教授太子諸王。以起居注魏觀侍太子說書。上問太子。近儒臣講說經史何事。對曰。昨講漢書。七國叛漢事。遂問此曲直孰在。對曰。曲在七國。上曰。此講官偏說耳。景帝爲太子時。常投博局。殺吳王世子。及爲帝。又聽晁錯之說。黜削諸侯。七國之變實由於此。若爲諸子講此。則當言藩王必上尊天子。下撫百姓。爲國家藩輔。以無撓天下公法。如此。則爲太子者。知敦睦九族。隆親親之恩。爲諸子者。知夾輔王室。盡君臣之義。甲辰。以孔希學襲封衍聖公。孔希大爲曲阜知縣。皆世襲。立孔顏孟三氏教授。司尼山。洙泗二書院。命博士孔克仁等授諸子經。功臣子弟亦令入學。十二月己巳。上退朝還宮。太子諸王侍上。指宮中隙地。謂之曰。此非不可起亭臺館榭爲游觀之所。誠不忍重傷民力耳。昔商紂瑤宮瑤室。天下怨之。漢文帝欲作露臺。惜百金之費。當時國富民安。爾等當存儆戒。辛未。詔中書省令禮官定官民喪。

服之制時人民仍元俗喪葬作樂娛尸御史高原侃奏禁之

二年春正月庚子上御奉天門召元舊臣問其政事得失馬翼對曰元有天下寬以得之亦寬以失之上曰以寬得之則聞之矣以寬失之未之聞也夫步急則躓弦急則絕民急則亂居上之道正當用寬元季君臣耽於逸樂循至淪亡其失在縱弛非寬也大抵聖王之道寬而有制不以廢棄爲寬簡而有節不以慢易爲簡施之適中則無弊矣免中原田租詔曰朕本淮右布衣因天下亂率衆渡江十有四年命將北征兵渡大河齊魯之民懽然饋迎近平燕都下晉冀民久被兵困征斂其北平山東山西免今年稅糧河南諸郡西抵潼關北界大河南至唐鄧光息亦行蠲免秦隴新附之民俱如一體以稱朕意免江南田租詔曰朕渡江之始駐兵太平繼克鎮江下宣城西征北伐罔不底定朕念創業之初諸郡供億繁重嘗深憫之今天下十定其九太平應天鎮江免糧稅一年甯國廣德無爲滁和亦如之二月丙寅詔修元史上謂廷臣曰近克元都得元十三朝實錄元雖亡史所以勸懲不可廢乃詔左丞相李善長前起居注宋濂漳州府通判王禕總裁徵山林遺逸之士汪克寬等十六人同纂修取元經世大典諸書資參考又遣儒士歐陽佑等往北平采訪元統至正事蹟壬午上躬耕籍田於南郊既又命皇后率內外命婦蠶於北郊以爲祭祀衣服三月戊申上與詹同論文章上曰古人爲文章以明道德通世務典謨之言皆明白易知至如諸葛孔明出師表亦何嘗雕刻爲文而誠意溢出生今誦之使人忠義感激近世文士立辭雖艱深而意實淺近即使相如揚雄何裨實用自今翰林爲文但取通道理明世務者無事浮藻夏四月癸巳淮安甯國鎮江揚州台州各獻瑞麥一莖五穗三穗者甚衆羣臣賀上曰朕爲生民主惟思

修德致和。使三光平。寒暑時。爲國家之瑞。不以物爲瑞也。漢武帝獲一角獸。產九莖芝。好功生事。卒使海內空虛。其後神爵。甘露之侈。至山崩地震。而漢德於是乎衰。由此觀之。嘉祥無徵。而災異有驗。可不戒哉。已而禮部尙書崔亮奏。祥瑞。國家休徵。按唐六典。四瑞有大瑞。上瑞。中瑞。下瑞。大瑞。景星。慶雲。麟。鳳。龜。龍之類。上瑞。白狼。赤兔之類。中瑞。蒼鳥。朱鴈之類。下瑞。岐麥。嘉禾。芝草。連理枝之類。今擬祥瑞合大瑞者。所司表奏。餘瑞驗實圖進。上曰。卿等所議。但及祥瑞。而不及災異。不知災異乃上天示戒。所繫尤重。今後四方或有災異。無論大小。皆令所司即時飛奏。上與侍臣論待大臣之體。劉基曰。古者公卿有罪。盤水加劍。密室自裁。未嘗鄙辱之。詹同因取大戴禮賈誼疏以進。六月丁卯。諭國子學官教養人才。國子生習騎射。秋八月己巳。命吏部定內侍諸司官制。上曰。朕觀周禮。闕寺未及百人。後世至踰數千。卒爲大患。今雖未能復古。亦當爲防微之計。古時此輩所治。止於酒漿醢醢。司服守祧。今朕亦不過以備使令。可斟酌其宜。毋令過多。又顧侍臣曰。求善良於中涓。百無一二。用爲耳目。卽耳目蔽。用爲腹心。卽腹心病。馭之道。但當使之畏法。不可使之有功。有功則驕恣。畏法則檢束。監察御史睢稼請命府州縣長吏。月朔會民讀法。詔儒臣纂修禮書。九月上。詔問羣臣建都之地。或言關中。天府之國。或言洛陽。天地之中。汴梁亦未舊京。或言北平宮室完備。上以平定之初。民未休息。供給力役。悉資江南。建業長江天塹。足以立國。臨濠前江後淮。以險可恃。以水可漕。詔以爲中都。冬十月辛巳。詔天下郡縣皆立學。上諭中書省臣曰。學校之設。名存實亡。兵革以來。人習戰鬪。朕謂治國之要。教化爲先。教化之道。學校爲本。今京師雖有太學。而天下學校未興。宜令郡縣皆立學。於是詔府設教授一。訓導四。生員四十人。州設學正一。訓導三。

生員三十人。縣設教諭一。訓導二。生員二十人。學者專治一經。以禮樂射御書數設科分教。務求實才。頑不率者黜之。

三年春二月壬戌。上行後苑。見鵲巢卵翼之勞。喟然而歎。令羣臣親老者許歸養。召浙西蘇州富民至京師。面諭毋凌弱。毋貪貧。毋虐小。毋欺老。孝敬父母。和睦親族。周恤貧乏。各賜酒食而遣之。戊子。詔天下有司推訪賢才。三月庚寅。免應天徽州等十三府州河南山東北平稅糧。丁酉。鄭州知州蘇琦。上言三事。一。關輔平涼北平遼右餘孽未平。調兵轉粟。事難卒辦。請議屯田積粟。以示久長。一。選重臣才兼文武。練達邊務者。分鎮要害。懷之以德。其沙漠非要害處。當毀其城郭。徙人民於內地。一。墾田以實中原。自辛卯河南兵起。天下騷然。十年之間。耕桑之地。變爲草莽。宜責之守令。召誘流徙未入簿之民。官給牛種。及時耕耨。其守令能增戶開田。從巡歷御史按察司申舉。書奏。命中書省采行之。夏四月。以危素爲翰林侍讀學士。已。謫素居和州。素居弘文館。一日。上御東閣。聞履聲。橐橐。上問爲誰。對曰。老臣危素。上曰。是爾耶。朕將謂文天祥耳。素惶懼頓首。上曰。素元朝老臣。何不赴和州看守。余闕廟去。遂有是謫。素踰年卒。夏五月甲午。置司農司。上以中原兵興以來。田多荒蕪。命省臣議計民授田。設官以領之。於是設司開治所於河南。乙未。嚴宮闈之政。著爲令。俾世守之。上以元末宮嬪女謁私通外臣。或番僧入宮。攝持受戒。而大臣命婦亦往來禁掖。淫瀆褻亂。遂深戒前代之失。著爲典。皇后止得治宮中嬪婦事。宮門之外不得與焉。宮費奏自尙宮內使監覆之。始支部。違者死。私書出外者罪如之。宮人疾言其狀。徵藥。羣臣命婦節慶朔望朝見中宮。無故不得入。人君無見外命婦禮。天子親王后妃。宮嬪慎選良家子女。進者勿受。

己亥。詔設科取士。定科舉格。初場各經義一道。四書義一道。二場論一道。詔誥表箋內科一道。三場策一道。中式者。後十日以騎射書策律五事試之。詔曰。成周之際。取才於貢士。賢者在職。民有士君子之行。漢唐宋科舉。但貴詞章。不求德藝。前元設科取士。權家勢要。結納奔競。賢者恥與竝進。甘隱山林。自今八月爲始。特設科舉。務在經明行修。博古通今。其中選者。朕將親策於廷。觀其學識。第其高下。而任之。非由科舉者。毋得爲官。許高麗安南占城諸國。以鄉貢赴試於京師。丁未。詔行大射禮。令太學生及天下郡縣學生員皆習射。辛亥。詔定服色。禮部奏。夏尙黑。殷尙白。周尙赤。秦尙黑。漢尙赤。唐服飾尙黃。旗幟尙赤。國家取法周漢。唐宋以爲治。尙亦爲宜。上從之。六月癸亥。詔嶽鎮海濱。竝去前代所封名號。以山水本名稱其神。禁淫祠。免蘇州漣糧。詔蘇松嘉湖杭五郡民無田產者。往臨濠耕種。以所種田爲世業。官給牛種。舟糧資遣。三年不徵稅。時徙者四千餘戶。秋九月。大明集禮書成。詔刊行之。其書以吉凶軍賓嘉冠服車輅儀仗鹵簿字學樂爲綱。所該之目。吉禮十四。曰祀天。曰祀地。曰宗廟。曰社稷。曰朝日。曰夕月。曰先農。曰太歲。風雷雲雨師。曰嶽鎮海瀆。天下山川。城隍。曰旗纛。曰馬祖。先牧。社馬。步。曰祭厲。曰祀典。神祇。曰三皇。孔子。嘉禮五。曰朝會。曰册拜。曰禮冠。曰婚。曰鄉飲酒禮。賓禮二。曰朝貢。曰遣使。軍禮三。曰親征。曰遣將。曰大射。凶禮二。曰弔賻。曰喪儀。又冠服。車輅。儀仗。鹵簿。字學。各一樂。三。曰鍾律。曰雅樂。曰俗樂。凡升降儀節。制度名數。皆備。具通五十卷。冬十月丙辰。御史袁凱言。保全功臣之道。從之。敕省臺延聘儒士於午門。與諸將說書。

四年春二月。免太平鎮江甯國田租。命工部遣官往廣東買耕牛。給中原屯種之民。三月。策試進士於

奉天殿。始令進士釋褐。行釋菜禮。遣使祭歷代帝王陵寢。祀帝王三十五。在河南者十。陳州祀伏羲。殷高宗。孟津祀漢光武。洛陽祀漢明帝。章帝。鄭州祀周世宗。鞏縣祀宋太祖。太宗。真宗。仁宗。在山西者一。滎河祀商湯。在山東者二。東平祀唐堯。曲阜祀少昊。在北平者三。內黃祀殷中宗。滑縣祀顓頊。高辛。在湖廣者二。鄱縣祀神農。甯遠祀虞舜。在浙江者二。會稽祀夏禹。宋孝宗。在陝西者十五。中部祀黃帝。咸陽祀周文王。武王。成王。康王。宣王。漢高帝。文帝。景帝。興平祀漢武帝。長安祀漢宣帝。三原祀唐高祖。醴泉祀唐太宗。蒲城祀唐憲宗。涇陽祀唐宣宗。閏三月。命吏部定內監等官品秩。自監正令五品以下。至從七品有差。上謂侍臣曰。古之宦豎。不過司晨昏。供使令而已。自漢鄧太后以女主稱制。不接公卿。乃以閹人爲常侍。小黃門通命。自此以來。權傾人主。吾防之極嚴。犯法者必斥去之。履霜堅冰之意也。夏五月。免江西浙江田租。六月。戊申。吏部尙書詹同。禮部尙書陶凱。作宴享九奏樂章。曰。本太初。曰。仰大明。曰。民初生。曰。品物亨。曰。御六龍。曰。泰階平。曰。君德成。曰。聖道成。曰。樂清甯。上以協律善之。悉屏俗樂。秋八月。免淮揚臨濠。秦滁。無爲田租。上手書問劉基曰。近西蜀平。疆宇恢廣。元以寬失天下。朕救之以猛。然小人但喜寬。遂恣誹謗。今天鳴八載。日中黑子疊見。卿宜條悉以聞。基上言。以爲雪霜之後。必有陽春。今國威已立。宜少濟以寬。上以其書付史館。或有言殺運三十年未除者。基曰。若使我當國。掃除俗弊。一二年後寬政可復也。

五年夏六月甲辰。命工部造紅牌。鑰戒諭后妃之辭。懸於宮中。定宦官禁令。冬十二月甲戌。敕中書命有司考課。必有學校農桑之績。違者降罰。已而莒州日照知縣馬亮考滿。無課農興學之效。而長於督運。

命黜之。山西汾州考平遙主簿成樂能恢辨商稅。上曰：恢辨是額外取民也。主簿職在佐理縣政。撫安百姓。豈以恢辨爲能。州之考非是。命吏部移文訊責。命仍祀孟子。初國子監請釋奠。命罷孟子祀。至是上曰：孟子闢邪說。辨異端。發明先聖之道。其復之。

六年春正月。來朝守令陞辭。諭以慈祥。豈弟。毋作僞。甲寅。以舉人張唯。王璉等爲編修。入文華堂肄業。

詔太子贊善宋濂。正字桂彥良爲之師。上聽政之暇。輒幸堂中。定其優劣。賜白金弓矢鞍馬。寵遇甚隆。

二月甲午。詔暫罷科舉。令有司察舉賢才。上諭中書省臣曰：朕設科舉。求天下賢才。以資任用。今所司多取文詞。及試用之。不能措諸行事者甚衆。朕以實心求賢。而天下以虛文應之。甚非所以稱朕意也。其暫罷天下科舉。有司察舉賢才。必以德行爲本文。藝次之。夏四月。命吏部訪求天下賢才。修昭鑒祖訓錄。初。上命陶凱等采摭漢唐以來藩王可爲觀戒者。書成。賜名昭鑒祖訓錄。目十三。曰箴戒。曰持守。曰嚴祭祀。曰謹出入。曰慎國政。曰禮義。曰法律。曰內令。曰內官。曰職制。曰兵衛。曰營繕。曰供用上親爲之。敍頒賜諸王。秋八月。上嘗從容諮正字桂彥良以治道。彥良對曰：道在正心。心不正。則好惡頗。好惡頗。則賞罰差。賞罰差。則太平未有期也。是時上懲元氏以寬縱失天下。頗用重典。上謂彥良曰：法數行而輒犯。柰何。彥良曰：用德則逸。用法則勞。上曰：江南大儒惟卿一人也。九月庚戌。詔禁對偶文辭。命翰林院儒臣擇唐宋名儒箋表可爲法者。羣臣以柳宗元代柳公綽謝表。及韓愈賀雨表進。令中書省頒爲式。冬十月壬辰。令考究前代糾劾內官法。十二月。令郡縣止存大寺觀一僧道。併居焉。禁女子四十下者爲尼。

七年春正月庚午。令六部官毋得輕調。有年勞者。就本部陞用。諭吏部曰。古稱任官惟賢才。凡郡縣得一賢守令。如潁川有黃霸。中牟有魯恭。何憂不治。今北方郡縣有民稀事簡者。而設官與繁劇同。其量減之。八年春正月甲子。詔天下郡縣訪窮民無依者。給衣食房舍。丁亥。詔天下閭里皆立社學。延師儒教子弟。有司以時程督。上以北方喪亂之後。命御史臺選國子生往各郡分教諭。曰。致治在於善俗。善俗本於教化。教化行。雖閭閻可使爲君子。教化廢。雖中材或墜於小人。給廩食衣服而遣之。山陽民父得罪。當杖子請代。上曰。朕爲孝子屈法。特釋之。十二月。陝州人獻天書。斬之。

九年夏六月。詔改中書行省爲承宣布政使司。秋九月。中書省奏福建參政魏鑑。瞿莊笞死奸吏。上曰。君之馭臣以禮。臣之馭吏以法。吏詐則政蠹。政蠹則民病。朕嘗令吏卒違法繩之以死。有司多不法。爲下所持。任其縱橫。莫敢誰何。今兩參政能寘奸吏於極刑。所謂惟仁人能惡人也。特賜璽書勞之。閏九月庚寅。欽天監奏五星紊度。日月相刑。下詔求言。山西平遙訓導葉居升聞詔。謂人曰。今天下有三事。其二事易見而患小。其一事難知而患大。此三者積於吾心久矣。雖不求。吾猶將言之。况有明詔乎。乃上言曰。臣觀當今之事。太過者有三。曰分封太侈也。曰用刑太繁也。曰求治太速也。臣觀歷代開國之君。未有不以尙德緩刑而結民心。亦未有不以專事刑罰而失民心。國祚長短。悉由於此。三代秦漢。隋唐享國之數。具在方冊。昭然可觀也。今議者曰。宋元中葉之後。紀綱不振。專事姑息。以致亡滅。陛下所以痛懲其弊。而矯枉之者也。姑以當今刑法言之。笞杖徒流。死今之五刑也。用此五刑。旣無假貸。一出乎大公至正可也。而用刑之際。多出聖衷。致使治獄之吏。務求深刻。以趨求上意。深刻者多獲功。平允者多獲罪。或至以賊

罪多寡爲殿最。欲求治獄之平允。豈易得哉。近者特旨雜犯死罪。免死充軍。其餘以次做流徒律。又刪定舊諸律條。減宥有差。此漸見寬宥。全活者衆。而主上好生之仁已藹然布乎宇內矣。然法司之治獄。猶循舊弊。雖有寬宥之名。而無寬宥之實。所謂實者在主上。不在臣下也。故必有罪疑惟輕之意。而後好生之德洽於民心。必有王三宥然後刑之政。而後有囹圄空虛之效。唐太宗曰。鸞棺之家欲歲之疫。非欲害於人。欲利於棺售故耳。今法司覈理一獄。必求深以成其考。今作何法。使得平允。古之爲士者。以登仕版爲榮。以罷職不敘爲辱。今之爲士者。以混迹無聞爲福。以受玷不錄爲幸。以屯田工役爲必獲之罪。以鞭笞捶楚爲尋常之辱。其始也。朝廷取天下之士。網羅摺撫。務無遺逸。有司催迫上道。如捕重囚。比至京師。而除官多以貌選。故所學或非其所聞。而其所用或非其所學。泊乎居官。言動一跌於法。苟免誅戮。則必屯田工役之科。所謂取之盡錙銖。用之如泥沙。率是爲常。少不顧惜。然此亦豈人主樂爲之事哉。欲人之懼而不敢犯也。竊見數年以來。誅殺亦可謂不細矣。而犯者日月相踵。豈下人之不懼哉。良由激濁揚清之不明。善惡賢愚之無別。議能之法既廢。以致人不自厲。而爲善者怠。若是非用刑之煩者乎。漢之世。嘗徙大族於山林矣。未聞實之以罪人也。今鳳陽皇陵所在。龍興之地。而率以罪人居之。以怨嗟愁苦之聲。充斥園邑朝廷。非所以恭承宗廟意也。賊人僞四大王突竄山谷。如狐如鼠。無窟可追。而乃勞重兵以討之。彼卽驚駭潰散。兼之深山大壑。人跡不能追踪之地。捕之數年。旣無其方。乃歸咎於新附戶籍之細民。而遷徙之。騷動四千里之地。雞犬不得甯息。况新附之民。日前兵難流於他所。朝廷許之復業。而來歸者。今乃就附籍者取其數。而盡遷之。是法不信於民也。夫有戶口。而後田野闢。田野闢而後賦稅增。臣恐自茲

之後。北郡戶口不復得增矣。凡此皆臣所謂太過而足以召災異者也。臣願自今朝廷宜錄大體。敕小過。明詔天下。備舉八議之法。嚴深刻之吏。斷獄平允者。則超遷之。苛刻聚斂者。則罷黜之。兆民自安。天變自消矣。昔者周自文武。至於成康。而後教化大行。漢自高帝。至於文景。而後號稱富庶。文王、武王、高帝之才。非不能使教化行。以致富庶也。蓋天下之治亂。氣化之轉移。人心之趨向。皆非一朝一夕之故。臣謂天下趨於治也。猶堅冰之將泮也。冰之堅。非太陽一日之光能消之也。陽氣發生。土脈微動。然後能使之融釋。聖人之治天下。亦猶是也。求治之道。莫先於正風俗。正風俗之道。莫先於使守令知所務。使守令知所務。莫先於使風憲知所重。使風憲知所重。莫先於朝廷知所尚。則必以簿書期會獄訟錢穀之不報爲可恕。而流俗失世敗壞爲不可不問。而後正風俗之道得矣。今之守令。以戶口錢糧簿書獄訟爲急務。至於農桑學校王政之本。乃視爲虛文。而置之不問。以農桑言之。方春州縣下一文帖。里甲申文狀而已。守令未嘗親點視種蒔次第。早澆預備之具也。以學校言之。廩膳生員國家資之以取人才之地也。守令亦鮮有禮讓之實。作其成器者。朝廷首重社學。守令徒具文案。備照刷而已。及憲司分部按臨。亦但循習故常。未嘗差一人巡行點視興廢之實。上下視爲虛文。如此。小民不知孝弟忠信爲何物。此守令未知所務之失也。風紀之司。所以代朝廷宣導風化。條舉綱目。至於聽訟讞獄。其一事耳。今專以訟獄爲要務。以獲贓多者爲稱職。以事績少者爲闕茸。一有不稱。雖有忠臣孝子義夫節婦。視爲虛文末節。而不暇舉。此風憲未知所重之失也。守令親民之官。風憲親臨守令之官。未知所務。如此。所以求善治而卒未能也。王制論鄉秀士升於司徒。司徒升於大學。大學正升諸司馬。司馬辨論官材。論定。然後官之任官。然後爵之。其考之

詳如此。今使天下郡縣生員升於太學。或未數月遽選入官者。閒亦有之。世閒奇才罕有如顏回、耿弇、鄧禹者。固未可拘於常法。開國以來。選舉秀才不爲不多。選任名位不爲不重。自今數之。賢者能有幾人乎。凡此皆臣所謂求治太速之過也。書奏。逮問。瘐死獄中。冬十月。上與侍臣論女寵。寺人、外戚、權臣、藩鎮、四裔之禍。曰：木必蠹而後風入之。體必虛而後病乘之。國家之事亦由是矣。漢亡於外戚。閹寺。唐亡於藩鎮。戎狄。然制之有道。貴賤有體。恩不掩義。女寵之禍。何自而生。不牽私愛。苟犯政典。裁以至公。外戚之禍。何由而作。閹寺職在使令。不假兵柄。則無寺人之禍。上下相維。大小相制。防壅蔽。謹威福。則無權臣之患。藩鎮之設。本以衛民。財歸有司。兵待符調。豈有跋扈之憂。至於御四裔。則修武備。謹邊防。來則禦之。去不窮追。豈有侵暴之虞。凡此數事。常欲著書。使後世子孫以時觀省。亦社稷無窮之利也。十二月。諭中書省臣：凡職官聽選者。早與銓注。勿使資用乏絕。仍令有司給舟車送之。

十年春正月。工部承差張致中。上言三事。其一。慎擇監察御史。二。京師各府州縣設常平倉。以時斂散。三。北方開墾曠土。令農民自實畝數。以定稅糧。守令不得賣里甲虛增額數。擢爲宛平知縣。二月。免仕者徭役。著爲令。夏五月。有內侍以久侍內庭。從容言及政事。上卽日斥遣還鄉。命終身不齒。諭羣臣曰：閹寺之人在左右久。其小忠小信。足以固結君心。及其久也。假威竊權。勢遂至於不可抑。朕立法。寺人不許預政事。今決去之。所以懲將來也。六月。詔天下臣民言事得實。封直達御前。秋八月庚戌。改建圓丘於南郊。先是。郊祀一如周禮。行之既久。風雨不時。災異迭見。上謂天地猶父母。父母異處。人情有所未安。乃命卽圓丘舊址爲壇。而以屋覆之。名大祀殿。癸丑。改建社稷壇於午門之右。共爲一壇。十一月丁亥。冬。

至合祀天地奉天殿。是年免河南山西廣東湖廣田租。

十一年春三月。禁奏事關白中書省。

十二年春三月。上退朝。御便殿。召儒臣論治道。以國子學官李思迪。馬懿。獨無言。誦之。

十三年春正月。詔罷中書省。陞六部官秩如古六卿之制。三月。命戶部減蘇松嘉湖四府重稅糧額。初。

王師圍姑蘇。久不下。上怒其民附寇。且困於富室。而更爲死守。因取諸豪族租簿。佃歷付有司。俾如其數。

爲額。蓋以懲一時也。至是。乃命減其額舊一畝科七斗五升至四斗五升者減十之二。四斗三升至三斗。

六升者止徵三斗。五月。詔免天下今年田租。還山西軍二萬四千人爲民。

十四年春三月。上以北方自喪亂後。經籍殘缺。命頒五經四書於北方學校。秋七月。舉孝弟力田賢良。

方正文學之士。以何德忠。金思存等爲參政。參議諸官。

十五年夏四月辛巳。廉州府巡檢王德亨。上言取西戎水銀坑。斥之。廣平府吏王允道。言磁州臨水鎮地。

產鐵。請如元時置鐵冶。都提舉司轄之。歲可收鐵百餘萬斤。上命杖之。流海外。五月。遣使求經。明行修。

之士。廣東儒士上治平策數千言。上以其不及用。賢責之。以秀才曾泰爲戶部尚書。泰江夏人。有學行。故。

不次擢用。上一日錄囚畢。命御史袁凱送東宮覆審。遞減之。凱還復命。上問朕與東宮孰是。凱頓首曰。

陛下法之正。東宮心之慈。上大喜。悉從之。秋九月。晉府長史桂彥良。上太平治要十二事。曰法天道。廣。

地理。順人心。養聖德。培國脈。開經筵。精選舉。審刑罰。敦教化。馭四裔。蒐才俊。廣咨訪。上嘉納之。

十六年夏四月。刑部尚書開濟議法巧密。上曰。竭澤而漁。害及鯤鯢。焚林而田。禍及麋鹿。巧密之法。百姓。

何堪。非朕所望也。濟強敏綜核。善深文。莫能自脫。嘗鬻獄。借死囚脫代。獄吏發之。捶獄吏死。冬十月。下濟獄。伏誅。

十七年春三月戊戌。頒行科舉成式。凡三年大比。鄉試試三場。八月初九日試四書義三。經義四。四書義主朱子集註。經義詩主朱子集傳。易主程。朱傳義。書主蔡氏傳及古註疏。春秋主左氏。公羊。穀梁。胡氏。張洽傳。禮記主古註疏。十二日試論一判語五。詔誥章表內科一。十五日試經史策五。禮部會試以二月與鄉試同。其舉人則國子學生。府州縣學生。暨儒士未仕。官之未入流者。應之。其學校訓導。專主生徒。罷閑官吏。倡優之家。與居父母喪者。俱不許入試。秋七月丁酉。敕內官毋預外事。凡諸司毋與內監文移往來。冬十月丁亥。以秀才宋矩等十七人爲監察御史。

十八年春正月。上諭戶部。農桑衣食之本。足食在於禁末作。足衣在於禁華靡。申明天下。四民各守其業。不許遊食。庶民衣錦繡。

十九年春三月。上諭戶部。國家賦稅已有定制。撙節用度。自有餘饒。輕徭抑末。使得盡力農桑。自然家給人足。毋事聚斂。傷國體。秋七月。詔舉經明行修。練達時務之士。年七十以上者。送京師。八月上。與侍臣論宋太宗改封樞庫爲內藏庫。上曰。人君以四海爲家。何有公私之別。太宗宋之賢君。亦復如是。他如漢靈帝西苑。唐德宗瓊林。大盈庫。不必深責。宋自乾德開寶以來。有司計度支所缺者。必籍其數。貸於內藏。課賦有餘。則償之。是猶爲商賈者。自與其家較量出入。內藏既盈。乃以牙籤別其名物。參驗帳籍。晚年出籤示真宗曰。善保此足矣。貽謀如此。何足爲訓。書曰。慎厥終。惟其始。太宗首開財利之端。及其後世。因

於兵革。三司財用耗竭。內藏積而不發。閒有發緡錢幾十萬佐軍需者。便以爲能行其所難。皆由太宗不能善始故也。

二十年春正月。上聞錦衣衛多以非法訊鞫罪囚。命取其刑具悉焚之。所繫囚仍送刑部審理。閏六月。申養老之政於天下。秋七月。有司請立武學。祀太公。上曰。文武非二塗也。太公從祀帝王廟。罷其舊祀。二十一年夏四月。庶吉士解縉上言。陛下取天下於羣盜。救生民於塗炭。此帝王之功也。絕女寵。寺人之患。亡聲色游畋之娛。此帝王之略也。乃國初至今二十載。無幾時不變之法。無一日無過之人。陛下嘗云。世不絕賢。又云。民不畏死。柰何以死懼之。陛下好善而善不顯。惡惡而惡日滋。良由誠信有閒。而用刑太繁也。嘗聞陛下震怒誅鋤奸逆矣。未聞詔書褒一大善。賞延於世者也。或朝賞而暮戮。或忽罪而忽赦。陛下每多自悔之時。輒有無及之嘆。陛下又好觀道德。心經說苑韻府諸書。臣竊謂劉向學不純師。陰氏韻府寒士叢說。臣願陛下聚儒生。上溯唐虞夏商周紀之奧。下及關閩濂洛之傳。令臣執筆。而隨其後。若夫配天宜復掃地之規。尊祖宜備七廟之制。太常非俗樂可肄。官伎非人道所爲。痛懲法外之刑。永革京城之役。婦女帷薄不修。方令逮繫。大臣過惡當誅。且勿加戮。做古藍田呂氏。今義門鄭氏家範。布之天下。率先以旌勸之行。授田均田之制。舉常平義倉之法。古時書院學田興復而廣益之。此化原所由始也。至律以人倫爲重。而有給配婦女之條。則又何取乎義夫節婦哉。夫棗盛之潔。衣服之舉。儀文之備。此畏天之末也。簿書之期。獄訟之斷。鈎距之巧。此治民之末也。上手持其疏。稱縉奇才。然以其言頗迂。不及行。二十二年冬十一月。上與翰林學士劉三吾論治民之道。三吾言。南北風俗不同。有可以德化。有當以威

制。上曰：地有南北，民無二心，德以化君子，威以制小人，不因乎地也。

二十三年春正月，削潮州生員陳質軍籍，質父成大甯已死，有司取質補伍，質上書請卒業。上曰：國家得一卒，易得一才難，朕豈少一持戟之士乎？許之，除其伍。

二十五年秋七月，岢嵐州學正吳從權、山陰教諭張恆給由至京師，上問民間疾苦，皆對曰：不知也，而非職事。上曰：宋儒胡瑗爲蘇湖教授，其教諸生，皆兼時務聖賢之道，所以濟世也。民情不知，則所教何事，其竄之極邊，命刑部榜諭天下學校。九月，詔求通曉歷數，推往知來者，爵封侯。山東監生周敬上疏諫，略曰：國祚修短，在德厚薄，非歷數可定。陛下但當修德，則國祚自傳萬世。陛下連年征伐，臣民皆以爲恥，不得傳國寶。臣聞傳國寶出自楚平王，秦始皇名之曰御璽，易曰：聖人之大寶曰位，何以守位曰仁。是知仁乃人君之寶，玉璽非寶也。方今力役繁興，戶口雖多，民勞者衆，賦斂過厚，倉廩雖實，民貧者多，教化博矣，而民不悅，法度嚴矣，而民不服。汲黯言於漢武帝曰：陛下內多欲而外施仁義，柰何欲效唐虞三代之治乎？方今國則願富，兵則願強，城池則願高深，宮室則願壯麗，土地則願廣，人民則願衆，於是多取軍士，廣積稅糧，征伐之功無虛日，土木之工無已時，如之何其可治也。洪武十二年，欽錄天下官吏，十三年大殺京民，不分臧否，豈無善人君子偶入註誤之中，方今水旱連年，未臻大稔，未必非殺戮無辜，感傷和氣之所致也。疏奏，上頗納其言，北征之議稍息。

二十六年夏四月，詔戶部諭天下有司，凡遇歲饑，先發倉廩貸民，然後奏聞，著爲令。秋七月戊申，選秀才張宗濬等隨詹事府左春坊官分班直文華殿侍講，畢進說民間利害，田里稼穡等事，兼陳古今孝弟

忠信文學才藝諸故事。日以爲常。尋以東宮官屬闕。徵浦江鄭王二姓子弟三十以上者。選用。九月甲子。以鄭濟爲左春坊左庶子。王勳爲右春坊右庶子。未幾擢鄭濟爲禮部尙書。冬十一月。天下學官入覲。上親詢以民間政事得失。秦州訓導門克新敷對亮直。紹興府教授王俊華文辭工贍。上擢克新爲左贊善。俊華爲右贊善。謂之曰。朕所以左克新而右俊華者。重直言故也。

二十七年夏四月庚戌。上謂工部曰。人之常情。飽則忘飢。煖則忘寒。一旦卒遇凶荒。則茫然無措。比年以來。時歲頗豐。然預防之計不可不早。爾工部其諭民間。但有隙地。皆令種植桑棗。授以種植法。又益種綿花。蠲其稅。歲終具數以聞。秋九月庚申。寰宇通志書成。方隅之目有八。東距遼東都司。東北至三萬衛。西極四川松潘衛。西南距雲南金齒。南踰廣東崖州。東南至福建漳州府。北暨太平大甯衛。西北至陝西甘肅。縱一萬九百里。橫一萬一千五百里。四裔不與焉。

二十八年夏六月己丑。諭羣臣。禁黥刺。腓。剝。鬲。割之刑。秋七月。有道士獻書。上曰。朕將躋天下生民於壽域。豈獨一己之長生久視哉。命卻之。

二十九年春三月壬申。詔文廟從祀。罷揚雄。進董仲舒。從行人司副楊砥言也。三十年夏五月甲寅。大明律告成。刊布中外。上御午門。諭羣臣以祥刑之意。諭侍讀張信。侍講戴彝。以論思爲職。凡國家政治得失。生民利病。當知無不言。昔唐陸贄。崔羣。李絳。在翰林。皆能正言。讜論。補益世道。當以古人自期。毋負擢用之意。九月辛亥。命戶部令天下人民。每鄉里各置木鐸。選年老者。每月六次持鐸。徇於道路。又令民每村置一鼓。凡遇農桑時。月晨起擊鼓。會田所怠惰者。里老督責之。里老不勸。

督者罰。遇婚姻死喪吉凶等事。一里之內互相賙給。十一月。上御奉天殿。見散騎舍人衣極鮮麗。上問制用幾何。對曰。五百貫。上曰。五百貫農夫數口之家一歲之資也。而爾費之一衣。驕奢若此。豈不暴殄。命切戒之。

三十一年春正月。上以山東河南民多惰於農事。命戶部遣人材分詣各郡。縣督民耕種。具籍所種田地與收穀粟之數以聞。

谷應泰曰。太祖以淮西布衣。仗劍討亂。十五年之間。遂成帝業。開明堂。禮上帝。功云烈矣。然而身在行間。手不輟書。禮致儒臣。深思治道。慨自宋葉凌遲。生民無主。西京禮樂。失自周遷。晉代風流。亡於江左。繼之元人失馭。濁亂乖離。自古禍亂浸淫。聖學放廢。未有若是之酷者也。非帝神靈崛起。智勇挺興。亦烏能克戡禍亂。率由舊章。撥亂反正。若斯之速者乎。觀其懲宦寺之失。而禁內官預政。懲女寵之禍。而戒母后臨朝。懲外戚之亂。而令不封后家。懲藩鎮之變。而制武臣不預兵柄。禍本亂階。防維略盡。至於著律令。定典禮。置百官。立宗廟。設軍衛。建學校。無不損益質文。斟酌美備。徧考百王之蹟。深明治亂之故。振墜緒於秦灰。永貽謀於周歷。夫沛公老死行閒。漢治盡仍秦弊。光武同符高祖。三公僅參吏治。唐美貞觀。內多慚德。宋推藝祖。外寡經營。求其網羅前哲。範圍後王。槩乎未之逮也。觀其官制典禮律令。寶訓女誡。臥碑木鐸。祖訓大言。炎炎至文。郁郁義監。二代法備三千。共貫同條。金聲玉振。所以吳札初來。必觀周禮。武王下車。不改商舊。蓋集大成者。難爲毀繼。至善者。難爲功龍門作史。不能成謗。帝之書。陸機悲吳。猶能著辨亡之論。以視秦中父老。誇美三章。宋室子孫。侈功杯酒。方斯盛軌。風云陋矣。而或者謂其誅戮韓彭。廣封宗室。